

LUCAM

Capitulum: **1** 2 3 4 5 6 7 8 9 10 11 12 13 14 15 16
17 18 19 20 21 22 23 24

CAPITULUM 1

Quoniam quidem multi conati sunt ordinare narrationem quae in nobis completae sunt rerum

² sicut tradiderunt nobis qui ab initio ipsi viderunt et ministri fuerunt sermonis

³ visum est et mihi adsecuto a principio omnibus diligenter ex ordine tibi scribere optime Theophile

⁴ ut cognoscas eorum verborum de quibus eruditus es veritatem

⁵ fuit in diebus Herodis regis Iudaeae sacerdos quidam nomine Zaccharias de vice Abia et uxor illi de filiabus Aaron et nomen eius Elisabeth

⁶ erant autem iusti ambo ante Deum incedentes in omnibus mandatis et iustificationibus Domini sine querella

⁷ et non erat illis filius eo quod esset Elisabeth sterilis et ambo processissent in diebus suis

⁸ factum est autem cum sacerdotio fungeretur in ordine vicis suae ante Deum

⁹ secundum consuetudinem sacerdotii sorte exiit ut incensum poneret ingressus in templum Domini

¹⁰ et omnis multitudo erat populi orans foris hora incensi

¹¹ apparuit autem illi angelus Domini stans a dextris altaris incensi

¹² et Zaccharias turbatus est videns et timor inruit super eum

¹³ ait autem ad illum angelus ne timeas Zaccharia quoniam exaudita est deprecatio tua et uxor tua Elisabeth pariet tibi filium et vocabis nomen eius Iohannem

¹⁴ et erit gaudium tibi et exultatio et multi in nativitate eius gaudebunt

¹⁵ erit enim magnus coram Domino et vinum et sicera non bibet et Spiritu Sancto replebitur adhuc ex utero matris suae

¹⁶ et multos filiorum Israel convertet ad Dominum Deum ipsorum

¹⁷ et ipse praecedet ante illum in spiritu et virtute Eliae ut convertat corda patrum in filios et incredibiles ad prudentiam iustorum parare Domino plebem perfectam

¹⁸ et dixit Zaccharias ad angelum unde hoc sciam ego enim sum senex et uxor mea processit in diebus suis

¹⁹ et respondens angelus dixit ei ego sum Gabrihel qui adsto ante Deum et missus sum loqui ad te et haec tibi evangelizare

²⁰ et ecce eris tacens et non poteris loqui usque in diem quo haec fiant pro eo quod non credidisti verbis meis quae implebuntur in tempore suo

21 et erat plebs expectans Zacchariam et mirabantur quod tardaret ipse in templo
22 egressus autem non poterat loqui ad illos et cognoverunt quod visionem vidisset in templo et ipse erat innuens illis et permansit mutus
23 et factum est ut impleti sunt dies officii eius abiit in domum suam
24 post hos autem dies concepit Elisabeth uxor eius et occultabat se mensibus quinque dicens
25 quia sic mihi fecit Dominus in diebus quibus respexit auferre obprobrium meum inter homines
26 in mense autem sexto missus est angelus Gabrihel a Deo in civitatem Galilaeae cui nomen Nazareth
27 ad virginem desponsatam viro cui nomen erat Ioseph de domo David et nomen virginis Maria
28 et ingressus angelus ad eam dixit have gratia plena Dominus tecum benedicta tu in mulieribus
29 quae cum vidisset turbata est in sermone eius et cogitabat qualis esset ista salutatio
30 et ait angelus ei ne timeas Maria invenisti enim gratiam apud Deum
31 ecce concipies in utero et paries filium et vocabis nomen eius Iesum
32 hic erit magnus et Filius Altissimi vocabitur et dabit illi Dominus Deus sedem David patris eius
33 et regnabit in domo Iacob in aeternum et regni eius non erit finis
34 dixit autem Maria ad angelum quomodo fiet istud quoniam virum non cognosco
35 et respondens angelus dixit ei Spiritus Sanctus superveniet in te et virtus Altissimi obumbrabit tibi ideoque et quod nascetur sanctum vocabitur Filius Dei
36 et ecce Elisabeth cognata tua et ipsa concepit filium in senecta sua et hic mensis est sextus illi quae vocatur sterilis
37 quia non erit impossibile apud Deum omne verbum
38 dixit autem Maria ecce ancilla Domini fiat mihi secundum verbum tuum et discessit ab illa angelus
39 exsurgens autem Maria in diebus illis abiit in montana cum festinatione in civitatem Iuda
40 et intravit in domum Zacchariae et salutavit Elisabeth
41 et factum est ut audivit salutationem Mariae Elisabeth exultavit infans in utero eius et repleta est Spiritu Sancto Elisabeth
42 et exclamavit voce magna et dixit benedicta tu inter mulieres et benedictus fructus ventris tui
43 et unde hoc mihi ut veniat mater Domini mei ad me
44 ecce enim ut facta est vox salutationis tuae in auribus meis exultavit in gaudio infans in utero meo
45 et beata quae credidit quoniam perficientur ea quae dicta sunt ei a Domino
46 et ait Maria magnificat anima mea Dominum
47 et exultavit spiritus meus in Deo salutari meo
48 quia respexit humilitatem ancillae suae ecce enim ex hoc beatam me dicent omnes generationes
49 quia fecit mihi magna qui potens est et sanctum nomen eius
50 et misericordia eius in progenies et progenies timentibus eum
51 fecit potentiam in brachio suo dispersit superbos mente cordis sui

52 deposuit potentes de sede et exaltavit humiles
53 esurientes implevit bonis et divites dimisit inanes
54 suscepit Israhel puerum suum memorari misericordiae
55 sicut locutus est ad patres nostros Abraham et semini eius in saecula
56 mansit autem Maria cum illa quasi mensibus tribus et reversa est in domum suam
57 Elisabeth autem impletum est tempus pariendi et peperit filium
58 et audierunt vicini et cognati eius quia magnificavit Dominus misericordiam suam cum illa et congratulabantur ei
59 et factum est in die octavo venerunt circumcidere puerum et vocabant eum nomine patris eius Zacchariam
60 et respondens mater eius dixit nequaquam sed vocabitur Iohannes
61 et dixerunt ad illam quia nemo est in cognatione tua qui vocetur hoc nomine
62 innuebant autem patri eius quem vellet vocari eum
63 et postulans pugillarem scripsit dicens Iohannes est nomen eius et mirati sunt universi
64 apertum est autem ilico os eius et lingua eius et loquebatur benedicens Deum
65 et factus est timor super omnes vicinos eorum et super omnia montana Iudaeae divulgabantur omnia verba haec
66 et posuerunt omnes qui audierant in corde suo dicentes quid putas puer iste erit etenim manus Domini erat cum illo
67 et Zaccharias pater eius impletus est Spiritu Sancto et prophetavit dicens
68 benedictus Deus Israhel quia visitavit et fecit redemptionem plebi suae
69 et erexit cornu salutis nobis in domo David pueri sui
70 sicut locutus est per os sanctorum qui a saeculo sunt prophetarum eius
71 salutem ex inimicis nostris et de manu omnium qui oderunt nos
72 ad faciendam misericordiam cum patribus nostris et memorari testamenti sui sancti
73 iusiurandum quod iuravit ad Abraham patrem nostrum
74 daturum se nobis ut sine timore de manu inimicorum nostrorum liberati serviamus illi
75 in sanctitate et iustitia coram ipso omnibus diebus nostris
76 et tu puer propheta Altissimi vocaberis praeibis enim ante faciem Domini parare vias eius
77 ad dandam scientiam salutis plebi eius in remissionem peccatorum eorum
78 per viscera misericordiae Dei nostri in quibus visitavit nos oriens ex alto
79 inluminare his qui in tenebris et in umbra mortis sedent ad dirigendos pedes nostros in viam pacis
80 puer autem crescebat et confortabatur spiritu et erat in deserto usque in diem ostensionis suae ad Israhel

CAPITULUM 2

factum est autem in diebus illis exiit edictum a Caesare Augusto ut describeretur universus orbis

- 2 haec descriptio prima facta est praeside Syriae Cyrino
- 3 et ibant omnes ut profiterentur singuli in suam civitatem
- 4 ascendit autem et Ioseph a Galilaea de civitate Nazareth in Iudaeam civitatem David

quae vocatur Bethleem eo quod esset de domo et familia David

⁵ ut profiteretur cum Maria desponsata sibi uxore praegnate

⁶ factum est autem cum essent ibi impleti sunt dies ut pareret

⁷ et peperit filium suum primogenitum et pannis eum involvit et reclinavit eum in praesepio quia non erat eis locus in diversorio

⁸ et pastores erant in regione eadem vigilantes et custodientes vigilias noctis supra gregem suum

⁹ et ecce angelus Domini stetit iuxta illos et claritas Dei circumfulsit illos et timuerunt timore magno

¹⁰ et dixit illis angelus nolite timere ecce enim evangelizo vobis gaudium magnum quod erit omni populo

¹¹ quia natus est vobis hodie salvator qui est Christus Dominus in civitate David

¹² et hoc vobis signum invenietis infantem pannis involutum et positum in praesepio

¹³ et subito facta est cum angelo multitudo militiae caelestis laudantium Deum et dicentium

¹⁴ gloria in altissimis Deo et in terra pax in hominibus bonae voluntatis

¹⁵ et factum est ut discesserunt ab eis angeli in caelum pastores loquebantur ad invicem transeamus usque Bethleem et videamus hoc verbum quod factum est quod fecit Dominus et ostendit nobis

¹⁶ et venerunt festinantes et invenerunt Mariam et Ioseph et infantem positum in praesepio

¹⁷ videntes autem cognoverunt de verbo quod dictum erat illis de puero hoc

¹⁸ et omnes qui audierunt mirati sunt et de his quae dicta erant a pastoribus ad ipsos

¹⁹ Maria autem conservabat omnia verba haec conferens in corde suo

²⁰ et reversi sunt pastores glorificantes et laudantes Deum in omnibus quae audierant et viderant sicut dictum est ad illos

²¹ et postquam consummati sunt dies octo ut circumcideretur vocatum est nomen eius Iesus quod vocatum est ab angelo priusquam in utero conciperetur

²² et postquam impleti sunt dies purgationis eius secundum legem Mosi tulerunt illum in Hierusalem ut sisterent eum Domino

²³ sicut scriptum est in lege Domini quia omne masculinum adaperiens vulvam sanctum Domino vocabitur

²⁴ et ut darent hostiam secundum quod dictum est in lege Domini par turturum aut duos pullos columbarum

²⁵ et ecce homo erat in Hierusalem cui nomen Symeon et homo iste iustus et timoratus expectans consolationem Israhel et Spiritus Sanctus erat in eo

²⁶ et responsum acceperat ab Spiritu Sancto non visurum se mortem nisi prius videret Christum Domini

²⁷ et venit in Spiritu in templum et cum inducerent puerum Iesum parentes eius ut facerent secundum consuetudinem legis pro eo

²⁸ et ipse accepit eum in ulnas suas et benedixit Deum et dixit

²⁹ nunc dimittis servum tuum Domine secundum verbum tuum in pace

³⁰ quia viderunt oculi mei salutare tuum

³¹ quod parasti ante faciem omnium populorum

³² lumen ad revelationem gentium et gloriam plebis tuae Israhel

33 et erat pater eius et mater mirantes super his quae dicebantur de illo
34 et benedixit illis Symeon et dixit ad Mariam matrem eius ecce positus est hic in ruinam et resurrectionem multorum in Israhel et in signum cui contradicetur
35 et tuam ipsius animam pertransiet gladius ut revelentur ex multis cordibus cogitationes
36 et erat Anna prophetissa filia Phanuhel de tribu Aser haec processerat in diebus multis et vixerat cum viro suo annis septem a virginitate sua
37 et haec vidua usque ad annos octoginta quattuor quae non discedebat de templo ieiuniis et obsecrationibus serviens nocte ac die
38 et haec ipsa hora superveniens confitebatur Domino et loquebatur de illo omnibus qui expectabant redemptionem Hierusalem
39 et ut perfecerunt omnia secundum legem Domini reversi sunt in Galilaeam in civitatem suam Nazareth
40 puer autem crescebat et confortabatur plenus sapientia et gratia Dei erat in illo
41 et ibant parentes eius per omnes annos in Hierusalem in die sollemni paschae
42 et cum factus esset annorum duodecim ascendentibus illis in Hierosolymam secundum consuetudinem diei festi
43 consummatisque diebus cum redirent remansit puer Iesus in Hierusalem et non cognoverunt parentes eius
44 existimantes autem illum esse in comitatu venerunt iter diei et requirebant eum inter cognatos et notos
45 et non inveniētes regressi sunt in Hierusalem requirentes eum
46 et factum est post triduum invenerunt illum in templo sedentem in medio doctorum audientem illos et interrogantem
47 stupebant autem omnes qui eum audiebant super prudentia et responsis eius
48 et videntes admirati sunt et dixit mater eius ad illum fili quid fecisti nobis sic ecce pater tuus et ego dolentes quaerebamus te
49 et ait ad illos quid est quod me quaerebatis nesciebatis quia in his quae Patris mei sunt oportet me esse
50 et ipsi non intellexerunt verbum quod locutus est ad illos
51 et descendit cum eis et venit Nazareth et erat subditus illis et mater eius conservabat omnia verba haec in corde suo
52 et Iesus proficiebat sapientia aetate et gratia apud Deum et homines

CAPITULUM 3

anno autem quintodecimo imperii Tiberii Caesaris procurante Pontio Pilato Iudaeam tetrarcha autem Galilaeae Herode Philippo autem fratre eius tetrarcha Itureae et Trachonitidis regionis et Lysania Abilinae tetrarcha

2 sub principibus sacerdotum Anna et Caiapha factum est verbum Dei super Iohannem Zacchariae filium in deserto

3 et venit in omnem regionem Iordanis praedicans baptismum paenitentiae in remissionem peccatorum

4 sicut scriptum est in libro sermonum Esaiiae prophetae vox clamantis in deserto parate viam Domini rectas facite semitas eius

5 omnis vallis implebitur et omnis mons et collis humiliabitur et erunt prava in directa et

aspera in vias planas

⁶ et videbit omnis caro salutare Dei

⁷ dicebat ergo ad turbas quae exiebant ut baptizarentur ab ipso genimina viperarum quis ostendit vobis fugere a ventura ira

⁸ facite ergo fructus dignos paenitentiae et ne coeperitis dicere patrem habemus Abraham dico enim vobis quia potest Deus de lapidibus istis suscitare filios Abrahae

⁹ iam enim securis ad radicem arborum posita est omnis ergo arbor non faciens fructum exciditur et in ignem mittitur

¹⁰ et interrogabant eum turbae dicentes quid ergo faciemus

¹¹ respondens autem dicebat illis qui habet duas tunicas det non habenti et qui habet escas similiter faciat

¹² venerunt autem et publicani ut baptizarentur et dixerunt ad illum magister quid faciemus

¹³ at ille dixit ad eos nihil amplius quam quod constitutum est vobis faciatis

¹⁴ interrogabant autem eum et milites dicentes quid faciemus et nos et ait illis neminem conculcatis neque calumniam faciatis et contenti estote stipendiis vestris

¹⁵ existimante autem populo et cogitantibus omnibus in cordibus suis de Iohanne ne forte ipse esset Christus

¹⁶ respondit Iohannes dicens omnibus ego quidem aqua baptizo vos venit autem fortior me cuius non sum dignus solvere corrigiam calciamentorum eius ipse vos baptizabit in Spiritu Sancto et igni

¹⁷ cuius ventilabrum in manu eius et purgabit aream suam et congregabit triticum in horreum suum paleas autem comburet igni inextinguibili

¹⁸ multa quidem et alia exhortans evangelizabat populum

¹⁹ Herodes autem tetrarcha cum corripere ab illo de Herodiade uxore fratris sui et de omnibus malis quae fecit Herodes

²⁰ adiecit et hoc supra omnia et inclusit Iohannem in carcere

²¹ factum est autem cum baptizaretur omnis populus et Iesu baptizato et orante apertum est caelum

²² et descendit Spiritus Sanctus corporali specie sicut columba in ipsum et vox de caelo facta est tu es Filius meus dilectus in te conplacuit mihi

²³ et ipse Iesus erat incipiens quasi annorum triginta ut putabatur filius Ioseph qui fuit Heli

²⁴ qui fuit Matthat qui fuit Levi qui fuit Melchi qui fuit Iannae qui fuit Ioseph

²⁵ qui fuit Matthatiae qui fuit Amos qui fuit Naum qui fuit Esli qui fuit Naggae

²⁶ qui fuit Maath qui fuit Matthatiae qui fuit Semei qui fuit Iosech qui fuit Ioda

²⁷ qui fuit Iohanna qui fuit Resa qui fuit Zorobabel qui fuit Salathiel qui fuit Neri

²⁸ qui fuit Melchi qui fuit Addi qui fuit Cosam qui fuit Helmadam qui fuit Her

²⁹ qui fuit Iesu qui fuit Eliezer qui fuit Iorim qui fuit Matthat qui fuit Levi

³⁰ qui fuit Symeon qui fuit Iuda qui fuit Ioseph qui fuit Iona qui fuit Eliachim

³¹ qui fuit Melea qui fuit Menna qui fuit Matthata qui fuit Nathan qui fuit David

³² qui fuit Iesse qui fuit Obed qui fuit Booz qui fuit Salmon qui fuit Naasson

³³ qui fuit Aminadab qui fuit Aram qui fuit Esrom qui fuit Phares qui fuit Iudae

³⁴ qui fuit Iacob qui fuit Isaac qui fuit Abraham qui fuit Thare qui fuit Nachor

³⁵ qui fuit Seruch qui fuit Ragau qui fuit Phalec qui fuit Eber qui fuit Sale

- ³⁶ qui fuit Cainan qui fuit Arfaxat qui fuit Sem qui fuit Noe qui fuit Lamech
³⁷ qui fuit Mathusalae qui fuit Enoch qui fuit Jared qui fuit Malelehel qui fuit Cainan
³⁸ qui fuit Enos qui fuit Seth qui fuit Adam qui fuit Dei

CAPITULUM 4

- I**esus autem plenus Spiritu Sancto regressus est ab Iordane et agebatur in Spiritu in desertum
² diebus quadraginta et temptabatur a diabolo et nihil manducavit in diebus illis et consummatis illis esuriit
³ dixit autem illi diabolus si Filius Dei es dic lapidi huic ut panis fiat
⁴ et respondit ad illum Iesus scriptum est quia non in pane solo vivet homo sed in omni verbo Dei
⁵ et duxit illum diabolus et ostendit illi omnia regna orbis terrae in momento temporis
⁶ et ait ei tibi dabo potestatem hanc universam et gloriam illorum quia mihi tradita sunt et cui volo do illa
⁷ tu ergo si adoraveris coram me erunt tua omnia
⁸ et respondens Iesus dixit illi scriptum est Dominum Deum tuum adorabis et illi soli servies
⁹ et duxit illum in Hierusalem et statuit eum supra pinnam templi et dixit illi si Filius Dei es mitte te hinc deorsum
¹⁰ scriptum est enim quod angelis suis mandabit de te ut conservent te
¹¹ et quia in manibus tollent te ne forte offendas ad lapidem pedem tuum
¹² et respondens Iesus ait illi dictum est non temptabis Dominum Deum tuum
¹³ et consummata omni temptatione diabolus recessit ab illo usque ad tempus
¹⁴ et regressus est Iesus in virtute Spiritus in Galilaeam et fama exiit per universam regionem de illo
¹⁵ et ipse docebat in synagogis eorum et magnificabatur ab omnibus
¹⁶ et venit Nazareth ubi erat nutritus et intravit secundum consuetudinem suam die sabbati in synagogam et surrexit legere
¹⁷ et traditus est illi liber prophetæ Esaiæ et ut revolvit librum invenit locum ubi scriptum erat
¹⁸ Spiritus Domini super me propter quod unxit me evangelizare pauperibus misit me
¹⁹ prædicare captivis remissionem et caecis visum dimittere confractos in remissionem prædicare annum Domini acceptum et diem retributionis
²⁰ et cum plicuisset librum reddidit ministro et sedit et omnium in synagoga oculi erant intendentes in eum
²¹ coepit autem dicere ad illos quia hodie impleta est hæc scriptura in auribus vestris
²² et omnes testimonium illi dabant et mirabantur in verbis gratiæ quæ procedebant de ore ipsius et dicebant nonne hic filius est Ioseph
²³ et ait illis utique dicetis mihi hanc similitudinem medice cura te ipsum quanta audivimus facta in Capharnaüm fac et hic in patria tua
²⁴ ait autem amen dico vobis quia nemo propheta acceptus est in patria sua
²⁵ in veritate dico vobis multæ viduæ erant in diebus Heliae in Israhel quando clusum est caelum annis tribus et mensibus sex cum facta est fames magna in omni terra

²⁶ et ad nullam illarum missus est Helias nisi in Sareptha Sidoniae ad mulierem viduam
²⁷ et multi leprosi erant in Israhel sub Heliseo propheta et nemo eorum mundatus est nisi Neman Syrus
²⁸ et repleti sunt omnes in synagoga ira haec audientes
²⁹ et surrexerunt et eiecerunt illum extra civitatem et duxerunt illum usque ad supercilium montis supra quem civitas illorum erat aedificata ut praecipitarent eum
³⁰ ipse autem transiens per medium illorum ibat
³¹ et descendit in CapharNahum civitatem Galilaeae ibique docebat illos sabbatis
³² et stupebant in doctrina eius quia in potestate erat sermo ipsius
³³ et in synagoga erat homo habens daemonium immundum et exclamavit voce magna
³⁴ dicens sine quid nobis et tibi Iesu Nazarene venisti perdere nos scio te qui sis Sanctus Dei
³⁵ et increpavit illi Iesus dicens obmutesce et exi ab illo et cum proiecisset illum daemonium in medium exiit ab illo nihilque illum nocuit
³⁶ et factus est pavor in omnibus et conloquebantur ad invicem dicentes quod est hoc verbum quia in potestate et virtute imperat immundis spiritibus et exeunt
³⁷ et divulgabatur fama de illo in omnem locum regionis
³⁸ surgens autem de synagoga introivit in domum Simonis socrus autem Simonis tenebatur magnis febribus et rogaverunt illum pro ea
³⁹ et stans super illam imperavit feбри et dimisit illam et continuo surgens ministrabat illis
⁴⁰ cum sol autem occidisset omnes qui habebant infirmos variis languoribus ducebant illos ad eum at ille singulis manus inponens curabat eos
⁴¹ exiebant autem etiam daemonia a multis clamantia et dicentia quia tu es Filius Dei et increpans non sinebat ea loqui quia sciebant ipsum esse Christum
⁴² facta autem die egressus ibat in desertum locum et turbae requirebant eum et venerunt usque ad ipsum et detinebant illum ne discederet ab eis
⁴³ quibus ille ait quia et aliis civitatibus oportet me evangelizare regnum Dei quia ideo missus sum
⁴⁴ et erat praedicans in synagogis Galilaeae

CAPITULUM 5

factum est autem cum turbae inruerent in eum ut audirent verbum Dei et ipse stabat secus stagnum Gennesareth
² et vidit duas naves stantes secus stagnum piscatores autem descenderant et lavabant retia
³ ascendens autem in unam navem quae erat Simonis rogavit eum a terra reducere pusillum et sedens docebat de navicula turbas
⁴ ut cessavit autem loqui dixit ad Simonem duc in altum et laxate retia vestra in capturam
⁵ et respondens Simon dixit illi praeceptor per totam noctem laborantes nihil cepimus in verbo autem tuo laxabo rete
⁶ et cum hoc fecissent concluserunt piscium multitudinem copiosam rumpebatur autem rete eorum
⁷ et annuerunt sociis qui erant in alia navi ut venirent et adiuarent eos et venerunt et impleverunt ambas naviculas ita ut mergerentur

⁸ quod cum videret Simon Petrus procidit ad genua Iesu dicens exi a me quia homo peccator sum Domine

⁹ stupor enim circumdederat eum et omnes qui cum illo erant in captura piscium quam ceperant

¹⁰ similiter autem Iacobum et Iohannem filios Zebedaei qui erant socii Simonis et ait ad Simonem Iesus noli timere ex hoc iam homines eris capiens

¹¹ et subductis ad terram navibus relictis omnibus secuti sunt illum

¹² et factum est cum esset in una civitatum et ecce vir plenus lepra et videns Iesum et procidens in faciem rogavit eum dicens Domine si vis potes me mundare

¹³ et extendens manum tetigit illum dicens volo mundare et confestim lepra discessit ab illo

¹⁴ et ipse praecepit illi ut nemini diceret sed vade ostende te sacerdoti et offer pro emundatione tua sicut praecepit Moyses in testimonium illis

¹⁵ perambulabat autem magis sermo de illo et conveniebant turbae multae ut audirent et curarentur ab infirmitatibus suis

¹⁶ ipse autem secedebat in deserto et orabat

¹⁷ et factum est in una dierum et ipse sedebat docens et erant Pharisei sedentes et legis doctores qui venerant ex omni castello Galilaeae et Iudaeae et Hierusalem et virtus erat Domini ad sanandum eos

¹⁸ et ecce viri portantes in lecto hominem qui erat paralyticus et quaerebant eum inferre et ponere ante eum

¹⁹ et non invenientes qua parte illum inferrent prae turba ascenderunt supra tectum per tegulas submiserunt illum cum lecto in medium ante Iesum

²⁰ quorum fidem ut vidit dixit homo remittuntur tibi peccata tua

²¹ et coeperunt cogitare scribae et Pharisei dicentes quis est hic qui loquitur blasphemias quis potest dimittere peccata nisi solus Deus

²² ut cognovit autem Iesus cogitationes eorum respondens dixit ad illos quid cogitatis in cordibus vestris

²³ quid est facilius dicere dimittuntur tibi peccata an dicere surge et ambula

²⁴ ut autem sciatis quia Filius hominis potestatem habet in terra dimittere peccata ait paralytico tibi dico surge tolle lectum tuum et vade in domum tuam

²⁵ et confestim surgens coram illis tulit in quo iacebat et abiit in domum suam magnificans Deum

²⁶ et stupor adprehendit omnes et magnificabant Deum et repleti sunt timore dicentes quia vidimus mirabilia hodie

²⁷ et post haec exiit et vidit publicanum nomine Levi sedentem ad teloneum et ait illi sequere me

²⁸ et relictis omnibus surgens secutus est eum

²⁹ et fecit ei convivium magnum Levi in domo sua et erat turba multa publicanorum et aliorum qui cum illis erant discumbentes

³⁰ et murmurabant Pharisei et scribae eorum dicentes ad discipulos eius quare cum publicanis et peccatoribus manducatis et bibitis

³¹ et respondens Iesus dixit ad illos non egent qui sani sunt medico sed qui male habent

³² non veni vocare iustos sed peccatores in paenitentiam

³³ at illi dixerunt ad eum quare discipuli Iohannis Ieiunant frequenter et obsecrationes faciunt similiter et Phariseorum tui autem edunt et bibunt

³⁴ quibus ipse ait numquid potestis filios sponsi dum cum illis est sponsus facere ieiunare
³⁵ venient autem dies et cum ablatus fuerit ab illis sponsus tunc ieiunabunt in illis diebus
³⁶ dicebat autem et similitudinem ad illos quia nemo commissuram a vestimento novo inmittit in vestimentum vetus alioquin et novum rumpit et veteri non convenit commissura a novo
³⁷ et nemo mittit vinum novum in utres veteres alioquin rumpet vinum novum utres et ipsum effundetur et utres peribunt
³⁸ sed vinum novum in utres novos mittendum est et utraque conservantur
³⁹ et nemo bibens vetus statim vult novum dicit enim vetus melius est

CAPITULUM 6

factum est autem in sabbato secundoprmo cum transiret per sata vellebant discipuli eius spicas et manducabant confricantes manibus
² quidam autem Phariseorum dicebant illis quid facitis quod non licet in sabbatis
³ et respondens Iesus ad eos dixit nec hoc legistis quod fecit David cum esurisset ipse et qui cum eo erant
⁴ quomodo intravit in domum Dei et panes propositionis sumpsit et manducavit et dedit his qui cum ipso erant quos non licet manducare nisi tantum sacerdotibus
⁵ et dicebat illis quia dominus est Filius hominis etiam sabbati
⁶ factum est autem et in alio sabbato ut intraret in synagogam et doceret et erat ibi homo et manus eius dextra erat arida
⁷ observabant autem scribae et Pharisei si in sabbato curaret ut invenirent accusare illum
⁸ ipse vero sciebat cogitationes eorum et ait homini qui habebat manum aridam surge et sta in medium et surgens stetit
⁹ ait autem ad illos Iesus interrogo vos si licet sabbato bene facere an male animam salvam facere an perdere
¹⁰ et circumspectis omnibus dixit homini extende manum tuam et extendit et restituta est manus eius
¹¹ ipsi autem repleti sunt insipientia et conloquebantur ad invicem quidnam facerent Iesu
¹² factum est autem in illis diebus exiit in montem orare et erat pernoctans in oratione Dei
¹³ et cum dies factus esset vocavit discipulos suos et elegit duodecim ex ipsis quos et apostolos nominavit
¹⁴ Simonem quem cognominavit Petrum et Andream fratrem eius Iacobum et Iohannem Philippum et Bartholomeum
¹⁵ Mattheum et Thomam Iacobum Alphei et Simonem qui vocatur Zelotes
¹⁶ Iudam Iacobi et Iudam Scarioth qui fuit proditor
¹⁷ et descendens cum illis stetit in loco campestri et turba discipulorum eius et multitudo copiosa plebis ab omni Iudaea et Hierusalem et maritimae Tyri et Sidonis
¹⁸ qui venerunt ut audirent eum et sanarentur a languoribus suis et qui vexabantur ab spiritibus inmundis curabantur
¹⁹ et omnis turba quaerebant eum tangere quia virtus de illo exiebat et sanabat omnes
²⁰ et ipse elevatis oculis in discipulos suos dicebat beati pauperes quia vestrum est regnum Dei

21 beati qui nunc esuritis quia saturabimini beati qui nunc fletis quia ridebitis

22 beati eritis cum vos oderint homines et cum separaverint vos et exprobraverint et eiecerint nomen vestrum tamquam malum propter Filium hominis

23 gaudete in illa die et exultate ecce enim merces vestra multa in caelo secundum haec enim faciebant prophetis patres eorum

24 verumtamen vae vobis divitibus quia habetis consolationem vestram

25 vae vobis qui saturati estis quia esurietis vae vobis qui ridetis nunc quia lugebitis et flebitis

26 vae cum bene vobis dixerint omnes homines secundum haec faciebant prophetis patres eorum

27 sed vobis dico qui auditis diligite inimicos vestros benefacite his qui vos oderunt

28 benedicite maledicentibus vobis orate pro calumniantibus vos

29 ei qui te percutit in maxillam praebe et alteram et ab eo qui aufert tibi vestimentum etiam tunicam noli prohibere

30 omni autem petenti te tribue et qui aufert quae tua sunt ne repetas

31 et prout vultis ut faciant vobis homines et vos facite illis similiter

32 et si diligitis eos qui vos diligunt quae vobis est gratia nam et peccatores diligentes se diligunt

33 et si benefeceritis his qui vobis benefaciunt quae vobis est gratia siquidem et peccatores hoc faciunt

34 et si mutuuum dederitis his a quibus speratis recipere quae gratia est vobis nam et peccatores peccatoribus fenerantur ut recipiant aequalia

35 verumtamen diligite inimicos vestros et benefacite et mutuuum date nihil desperantes et erit merces vestra multa et eritis filii Altissimi quia ipse benignus est super ingratos et malos

36 estote ergo misericordes sicut et Pater vester misericors est

37 nolite iudicare et non iudicabimini nolite condemnare et non condemnabimini dimittite et dimittimini

38 date et dabitur vobis mensuram bonam confersam et coagitatam et supereffluentem dabunt in sinum vestrum eadem quippe mensura qua mensi fueritis remetietur vobis

39 dicebat autem illis et similitudinem numquid potest caecus caecum ducere nonne ambo in foveam cadent

40 non est discipulus super magistrum perfectus autem omnis erit sicut magister eius

41 quid autem vides festucam in oculo fratris tui trabem autem quae in oculo tuo est non consideras

42 et quomodo potes dicere fratri tuo frater sine eiciam festucam de oculo tuo ipse in oculo tuo trabem non videns hypocrita eice primum trabem de oculo tuo et tunc perspicies ut educas festucam de oculo fratris tui

43 non est enim arbor bona quae facit fructus malos neque arbor mala faciens fructum bonum

44 unaquaeque enim arbor de fructu suo cognoscitur neque enim de spinis colligunt ficus neque de rubo vindemiant uvam

45 bonus homo de bono thesauro cordis sui profert bonum et malus homo de malo profert malum ex abundantia enim cordis os loquitur

46 quid autem vocatis me Domine Domine et non facitis quae dico

47 omnis qui venit ad me et audit sermones meos et facit eos ostendam vobis cui similis

est

⁴⁸ similis est homini aedificanti domum qui fodit in altum et posuit fundamenta supra petram inundatione autem facta inlissum est flumen domui illi et non potuit eam movere fundata enim erat supra petram

⁴⁹ qui autem audivit et non fecit similis est homini aedificanti domum suam supra terram sine fundamento in quam inlissus est fluvius et continuo concidit et facta est ruina domus illius magna

CAPITULUM 7

Cum autem impleisset omnia verba sua in aures plebis intravit Capharnaum

² centurionis autem cuiusdam servus male habens erat moriturus qui illi erat pretiosus

³ et cum audisset de Iesu misit ad eum seniores Iudaeorum rogans eum ut veniret et salvaret servum eius

⁴ at illi cum venissent ad Iesum rogabant eum solliciti dicentes ei quia dignus est ut hoc illi praestes

⁵ diligit enim gentem nostram et synagogam ipse aedificavit nobis

⁶ Iesus autem ibat cum illis et cum iam non longe esset a domo misit ad eum centurio amicos dicens Domine noli vexari non enim dignus sum ut sub tectum meum intres

⁷ propter quod et me ipsum non sum dignum arbitratus ut venirem ad te sed dic verbo et sanabitur puer meus

⁸ nam et ego homo sum sub potestate constitutus habens sub me milites et dico huic vade et vadit et alio veni et venit et servo meo fac hoc et facit

⁹ quo audito Iesus miratus est et conversus sequentibus se turbis dixit amen dico vobis nec in Israhel tantam fidem inveni

¹⁰ et reversi qui missi fuerant domum invenerunt servum qui languerat sanum

¹¹ et factum est deinceps ibat in civitatem quae vocatur Naim et ibant cum illo discipuli eius et turba copiosa

¹² cum autem adpropinquaret portae civitatis et ecce defunctus efferebatur filius unicus matri suae et haec vidua erat et turba civitatis multa cum illa

¹³ quam cum vidisset Dominus misericordia motus super ea dixit illi noli flere

¹⁴ et accessit et tetigit loculum huius autem qui portabant steterunt et ait adolescens tibi dico surge

¹⁵ et resedit qui erat mortuus et coepit loqui et dedit illum matri suae

¹⁶ accepit autem omnes timor et magnificabant Deum dicentes quia propheta magnus surrexit in nobis et quia Deus visitavit plebem suam

¹⁷ et exiit hic sermo in universam Iudaeam de eo et omnem circa regionem

¹⁸ et nuntiaverunt Iohanni discipuli eius de omnibus his

¹⁹ et convocavit duos de discipulis suis Iohannes et misit ad Dominum dicens tu es qui venturus es an alium expectamus

²⁰ cum autem venissent ad eum viri dixerunt Iohannes Baptista misit nos ad te dicens tu es qui venturus es an alium expectamus

²¹ in ipsa autem hora curavit multos a languoribus et plagis et spiritibus malis et caecis multis donavit visum

²² et respondens dixit illis euntes nuntiate Iohanni quae vidistis et audistis quia caeci vident claudi ambulant leprosi mundantur surdi audiunt mortui resurgunt pauperes

evangelizantur

23 et beatus est quicumque non fuerit scandalizatus in me

24 et cum discessissent nuntii Iohannis coepit dicere de Iohanne ad turbas quid existis in desertum videre harundinem vento moveri

25 sed quid existis videre hominem mollibus vestimentis indutum ecce qui in veste pretiosa sunt et deliciis in domibus regum sunt

26 sed quid existis videre prophetam utique dico vobis et plus quam prophetam

27 hic est de quo scriptum est ecce mitto angelum meum ante faciem tuam qui praeparabit viam tuam ante te

28 dico enim vobis maior inter natos mulierum propheta Iohanne Baptista nemo est qui autem minor est in regno Dei maior est illo

29 et omnis populus audiens et publicani iustificaverunt Deum baptizati baptismo Iohannis

30 Pharisei autem et legis periti consilium Dei spreverunt in semet ipsos non baptizati ab eo

31 cui ergo similes dicam homines generationis huius et cui similes sunt

32 similes sunt pueris sedentibus in foro et loquentibus ad invicem et dicentibus cantavimus vobis tibiis et non saltastis lamentavimus et non plorastis

33 venit enim Iohannes Baptista neque manducans panem neque bibens vinum et dicitis daemonium habet

34 venit Filius hominis manducans et bibens et dicitis ecce homo devorator et bibens vinum amicus publicanorum et peccatorum

35 et iustificata est sapientia ab omnibus filiis suis

36 rogabat autem illum quidam de Phariseis ut manducaret cum illo et ingressus domum Pharisei discubuit

37 et ecce mulier quae erat in civitate peccatrix ut cognovit quod accubuit in domo Pharisei adtulit alabastrum unguenti

38 et stans retro secus pedes eius lacrimis coepit rigare pedes eius et capillis capitis sui tergebat et osculabatur pedes eius et unguento unguebat

39 videns autem Phariseus qui vocaverat eum ait intra se dicens hic si esset propheta sciret utique quae et qualis mulier quae tangit eum quia peccatrix est

40 et respondens Iesus dixit ad illum Simon habeo tibi aliquid dicere at ille ait magister dic

41 duo debitores erant cuidam feneratori unus debebat denarios quingentos alius quinquaginta

42 non habentibus illis unde redderent donavit utrisque quis ergo eum plus diligit

43 respondens Simon dixit aestimo quia is cui plus donavit at ille dixit ei recte iudicasti

44 et conversus ad mulierem dixit Simoni vides hanc mulierem intravi in domum tuam aquam pedibus meis non dedisti haec autem lacrimis rigavit pedes meos et capillis suis tersit

45 osculum mihi non dedisti haec autem ex quo intravit non cessavit osculari pedes meos

46 oleo caput meum non unxisti haec autem unguento unxit pedes meos

47 propter quod dico tibi remittentur ei peccata multa quoniam dilexit multum cui autem minus dimittitur minus diligit

48 dixit autem ad illam remittuntur tibi peccata

⁴⁹ et coeperunt qui simul accumbebant dicere intra se quis est hic qui etiam peccata dimittit

⁵⁰ dixit autem ad mulierem fides tua te salvam fecit vade in pace

CAPITULUM 8

Et factum est deinceps et ipse iter faciebat per civitatem et castellum praedicans et evangelizans regnum Dei et duodecim cum illo

² et mulieres aliquae quae erant curatae ab spiritibus malignis et infirmitatibus Maria quae vocatur Magdalene de qua daemonia septem exierant

³ et Iohanna uxor Chuza procuratoris Herodis et Susanna et aliae multae quae ministrabant eis de facultatibus suis

⁴ cum autem turba plurima conveniret et de civitatibus properarent ad eum dixit per similitudinem

⁵ exiit qui seminat seminare semen suum et dum seminat aliud cecidit secus viam et conculcatum est et volucres caeli comederunt illud

⁶ et aliud cecidit supra petram et natum aruit quia non habebat humorem

⁷ et aliud cecidit inter spinas et simul exortae spinae suffocaverunt illud

⁸ et aliud cecidit in terram bonam et ortum fecit fructum centuplum haec dicens clamabat qui habet aures audiendi audiat

⁹ interrogabant autem eum discipuli eius quae esset haec parabola

¹⁰ quibus ipse dixit vobis datum est nosse mysterium regni Dei ceteris autem in parabolis ut videntes non videant et audientes non intellegant

¹¹ est autem haec parabola semen est verbum Dei

¹² qui autem secus viam sunt qui audiunt deinde venit diabolus et tollit verbum de corde eorum ne credentes salvi fiant

¹³ nam qui supra petram qui cum audierint cum gaudio suscipiunt verbum et hii radices non habent qui ad tempus credunt et in tempore temptationis recedunt

¹⁴ quod autem in spinis cecidit hii sunt qui audierunt et a sollicitudinibus et divitiis et voluptatibus vitae euntes suffocantur et non referunt fructum

¹⁵ quod autem in bonam terram hii sunt qui in corde bono et optimo audientes verbum retinent et fructum adferunt in patientia

¹⁶ nemo autem lucernam accendens operit eam vaso aut subtus lectum ponit sed supra candelabrum ponit ut intrantes videant lumen

¹⁷ non enim est occultum quod non manifestetur nec absconditum quod non cognoscatur et in palam veniat

¹⁸ videte ergo quomodo auditis qui enim habet dabitur illi et quicumque non habet etiam quod putat se habere auferetur ab illo

¹⁹ venerunt autem ad illum mater et fratres eius et non poterant adire ad eum prae turba

²⁰ et nuntiatum est illi mater tua et fratres tui stant foris volentes te videre

²¹ qui respondens dixit ad eos mater mea et fratres mei hii sunt qui verbum Dei audiunt et faciunt

²² factum est autem in una dierum et ipse ascendit in naviculam et discipuli eius et ait ad illos transfretemus trans stagnum et ascenderunt

²³ navigantibus autem illis obdormiit et descendit procella venti in stagnum et

conplebantur et periclitabantur

24 accedentes autem suscitaverunt eum dicentes praeceptor perimus at ille surgens increpavit ventum et tempestatem aquae et cessavit et facta est tranquillitas

25 dixit autem illis ubi est fides vestra qui timentes mirati sunt dicentes ad invicem quis putas hic est quia et ventis imperat et mari et oboediunt ei

26 enavigaverunt autem ad regionem Gerasenorum quae est contra Galilaeam

27 et cum egressus esset ad terram occurrit illi vir quidam qui habebat daemonium iam temporibus multis et vestimento non induebatur neque in domo manebat sed in monumentis

28 is ut vidit Iesum procidit ante illum et exclamans voce magna dixit quid mihi et tibi est Iesu Fili Dei altissimi obsecro te ne me torqueas

29 praecipiebat enim spiritui inmundi ut exiret ab homine multis enim temporibus arripiebat illum et vinciebatur catenis et conpedibus custoditus et ruptis vinculis agebatur a daemonio in deserta

30 interrogavit autem illum Iesus dicens quod tibi nomen est at ille dixit Legio quia intraverunt daemonia multa in eum

31 et rogabant illum ne imperaret illis ut in abyssum irent

32 erat autem ibi grex porcorum multorum pascentium in monte et rogabant eum ut permetteret eos in illos ingredi et permisit illos

33 exierunt ergo daemonia ab homine et intraverunt in porcos et impetu abiit grex per praeceptum in stagnum et suffocatus est

34 quod ut viderunt factum qui pascebant fugerunt et nuntiaverunt in civitatem et in villas

35 exierunt autem videre quod factum est et venerunt ad Iesum et invenerunt hominem sedentem a quo daemonia exierant vestitum ac sana mente ad pedes eius et timuerunt

36 nuntiaverunt autem illis et qui viderant quomodo sanus factus esset a Legione

37 et rogaverunt illum omnis multitudo regionis Gerasenorum ut discederet ab ipsis quia timore magno tenebantur ipse autem ascendens navem reversus est

38 et rogabat illum vir a quo daemonia exierant ut cum eo esset dimisit autem eum Iesus dicens

39 redi domum tuam et narra quanta tibi fecit Deus et abiit per universam civitatem praedicans quanta illi fecisset Iesus

40 factum est autem cum redisset Iesus excepit illum turba erant enim omnes expectantes eum

41 et ecce venit vir cui nomen Iairus et ipse princeps synagogae erat et cecidit ad pedes Iesu rogans eum ut intraret in domum eius

42 quia filia unica erat illi fere annorum duodecim et haec moriebatur et contigit dum iret a turbis conprimebatur

43 et mulier quaedam erat in fluxu sanguinis ab annis duodecim quae in medicos erogaverat omnem substantiam suam nec ab ullo potuit curari

44 accessit retro et tetigit fimbriam vestimenti eius et confestim stetit fluxus sanguinis eius

45 et ait Iesus quis est qui me tetigit negantibus autem omnibus dixit Petrus et qui cum illo erant praeceptor turbae te comprimunt et adfligunt et dicis quis me tetigit

46 et dixit Iesus tetigit me aliquis nam ego novi virtutem de me exisse

47 videns autem mulier quia non latuit tremens venit et procidit ante pedes illius et ob quam causam tetigerit eum indicavit coram omni populo et quemadmodum confestim sanata sit

- 48** at ipse dixit illi filia fides tua te salvam fecit vade in pace
- 49** adhuc illo loquente venit a principe synagogae dicens ei quia mortua est filia tua noli vexare illum
- 50** Iesus autem audito hoc verbo respondit patri puellae noli timere crede tantum et salva erit
- 51** et cum venisset domum non permisit intrare secum quemquam nisi Petrum et Iohannem et Iacobum et patrem et matrem puellae
- 52** flebant autem omnes et plangebant illam at ille dixit nolite flere non est mortua sed dormit
- 53** et deridebant eum scientes quia mortua esset
- 54** ipse autem tenens manum eius clamavit dicens puella surge
- 55** et reversus est spiritus eius et surrexit continuo et iussit illi dari manducare
- 56** et stupuerunt parentes eius quibus praecepit ne alicui dicerent quod factum erat

CAPITULUM 9

- C**onvocatis autem duodecim apostolis dedit illis virtutem et potestatem super omnia daemonia et ut languores curarent
- 2** et misit illos praedicare regnum Dei et sanare infirmos
- 3** et ait ad illos nihil tuleritis in via neque virgam neque peram neque panem neque pecuniam neque duas tunicas habeatis
- 4** et in quamcumque domum intraveritis ibi manete et inde ne exeatis
- 5** et quicumque non receperint vos exeuntes de civitate illa etiam pulverem pedum vestrorum excutite in testimonium supra illos
- 6** egressi autem circumibant per castella evangelizantes et curantes ubique
- 7** audivit autem Herodes tetrarcha omnia quae fiebant ab eo et haesitabat eo quod diceretur
- 8** a quibusdam quia Iohannes surrexit a mortuis a quibusdam vero quia Helias apparuit ab aliis autem quia propheta unus de antiquis surrexit
- 9** et ait Herodes Iohannem ego decollavi quis autem est iste de quo audio ego talia et quaerebat videre eum
- 10** et reversi apostoli narraverunt illi quaecumque fecerunt et adsumptis illis secessit seorsum in locum desertum qui est Bethsaida
- 11** quod cum cognovissent turbae secutae sunt illum et excepit illos et loquebatur illis de regno Dei et eos qui cura indigebant sanabat
- 12** dies autem coeperat declinare et accedentes duodecim dixerunt illi dimitte turbas ut euntes in castella villasque quae circa sunt devertant et inveniant escas quia hic in loco deserto sumus
- 13** ait autem ad illos vos date illis manducare at illi dixerunt non sunt nobis plus quam quinque panes et duo pisces nisi forte nos eamus et emamus in omnem hanc turbam escas
- 14** erant autem fere viri quinque milia ait autem ad discipulos suos facite illos discumbere per convivia quinquagenos
- 15** et ita fecerunt et discumbere fecerunt omnes
- 16** acceptis autem quinque panibus et duobus piscibus respexit in caelum et benedixit illis

et fregit et distribuit discipulis suis ut ponerent ante turbas

17 et manducaverunt omnes et saturati sunt et sublatum est quod superfuit illis fragmentorum cofini duodecim

18 et factum est cum solus esset orans erant cum illo et discipuli et interrogavit illos dicens quem me dicunt esse turbae

19 at illi responderunt et dixerunt Iohannem Baptistam alii autem Heliam alii quia propheta unus de prioribus surrexit

20 dixit autem illis vos autem quem me esse dicitis respondens Simon Petrus dixit Christum Dei

21 at ille increpans illos praecepit ne cui dicerent hoc

22 dicens quia oportet Filium hominis multa pati et reprobari a senioribus et principibus sacerdotum et scribis et occidi et tertia die resurgere

23 dicebat autem ad omnes si quis vult post me venire abneget se ipsum et tollat crucem suam cotidie et sequatur me

24 qui enim voluerit animam suam salvam facere perdet illam nam qui perdiderit animam suam propter me salvam faciet illam

25 quid enim proficit homo si lucretur universum mundum se autem ipsum perdat et detrimentum sui faciat

26 nam qui me erubuerit et meos sermones hunc Filius hominis erubescet cum venerit in maiestate sua et Patris et sanctorum angelorum

27 dico autem vobis vere sunt aliqui hic stantes qui non gustabunt mortem donec videant regnum Dei

28 factum est autem post haec verba fere dies octo et adsumpsit Petrum et Iohannem et Iacobum et ascendit in montem ut oraret

29 et factum est dum oraret species vultus eius altera et vestitus eius albus refulgens

30 et ecce duo viri loquebantur cum illo erant autem Moses et Helias

31 visi in maiestate et dicebant excessum eius quem completurus erat in Hierusalem

32 Petrus vero et qui cum illo gravati erant somno et evigilantes viderunt maiestatem eius et duos viros qui stabant cum illo

33 et factum est cum discederent ab illo ait Petrus ad Iesum praeceptor bonum est nos hic esse et faciamus tria tabernacula unum tibi et unum Mosi et unum Heliae nesciens quid diceret

34 haec autem illo loquente facta est nubes et obumbravit eos et timuerunt intransibilibus illis in nubem

35 et vox facta est de nube dicens hic est Filius meus electus ipsum audite

36 et dum fieret vox inventus est Iesus solus et ipsi tacuerunt et nemini dixerunt in illis diebus quicquam ex his quae viderant

37 factum est autem in sequenti die descendentibus illis de monte occurrit illi turba multa

38 et ecce vir de turba exclamavit dicens magister obsecro te respice in filium meum quia unicus est mihi

39 et ecce spiritus adprehendit illum et subito clamat et elidit et dissipat eum cum spuma et vix discedit dilanians eum

40 et rogavi discipulos tuos ut eicerent illum et non potuerunt

41 respondens autem Iesus dixit o generatio infidelis et perversa usquequo ero apud vos et patiar vos adduc huc filium tuum

42 et cum accederet elisit illum daemonium et dissipavit

⁴³ et increpavit Iesus spiritum immundum et sanavit puerum et reddidit illum patri eius
⁴⁴ stupebant autem omnes in magnitudine Dei omnibusque mirantibus in omnibus quae faciebat dixit ad discipulos suos ponite vos in cordibus vestris sermones istos Filius enim hominis futurum est ut tradatur in manus hominum
⁴⁵ at illi ignorabant verbum istud et erat velatum ante eos ut non sentirent illud et timebant interrogare eum de hoc verbo
⁴⁶ intravit autem cogitatio in eos quis eorum maior esset
⁴⁷ at Iesus videns cogitationes cordis illorum adprehendens puerum statuit eum secus se
⁴⁸ et ait illis quicumque susceperit puerum istum in nomine meo me recipit et quicumque me recipit recipit eum qui me misit nam qui minor est inter omnes vos hic maior est
⁴⁹ respondens autem Iohannes dixit praeceptor vidimus quendam in nomine tuo eicientem daemonia et prohibuimus eum quia non sequitur nobiscum
⁵⁰ et ait ad illum Iesus nolite prohibere qui enim non est adversum vos pro vobis est
⁵¹ factum est autem dum conplerentur dies adsumptionis eius et ipse faciem suam firmavit ut iret Hierusalem
⁵² et misit nuntios ante conspectum suum et euntes intraverunt in civitatem Samaritanorum ut pararent illi
⁵³ et non receperunt eum quia facies eius erat euntis Hierusalem
⁵⁴ cum vidissent autem discipuli eius Iacobus et Iohannes dixerunt Domine vis dicimus ut ignis descendat de caelo et consumat illos
⁵⁵ et conversus increpavit illos
⁵⁶ et abierunt in aliud castellum
⁵⁷ factum est autem ambulantiis illis in via dixit quidam ad illum sequar te quocumque ieris
⁵⁸ et ait illi Iesus vulpes foveas habent et volucres caeli nidos Filius autem hominis non habet ubi caput reclinet
⁵⁹ ait autem ad alterum sequere me ille autem dixit Domine permitte mihi primum ire sepelire patrem meum
⁶⁰ dixitque ei Iesus sine ut mortui sepeliant mortuos suos tu autem vade adnuntia regnum Dei
⁶¹ et ait alter sequar te Domine sed primum permitte mihi renuntiare his qui domi sunt
⁶² ait ad illum Iesus nemo mittens manum suam in aratrum et aspiciens retro aptus est regno Dei

CAPITULUM 10

post haec autem designavit Dominus et alios septuaginta duos et misit illos binos ante faciem suam in omnem civitatem et locum quo erat ipse venturus
² et dicebat illis messis quidem multa operarii autem pauci rogate ergo Dominum messis ut mittat operarios in messem
³ ite ecce ego mitto vos sicut agnos inter lupos
⁴ nolite portare sacculum neque peram neque calciamenta et neminem per viam salutaveritis
⁵ in quamcumque domum intraveritis primum dicite pax huic domui
⁶ et si ibi fuerit filius pacis requiescet super illam pax vestra sin autem ad vos revertetur

⁷ in eadem autem domo manete edentes et bibentes quae apud illos sunt dignus enim est operarius mercede sua nolite transire de domo in domum

⁸ et in quamcumque civitatem intraveritis et susceperint vos manducate quae adponuntur vobis

⁹ et curate infirmos qui in illa sunt et dicite illis adpropinquavit in vos regnum Dei

¹⁰ in quamcumque civitatem intraveritis et non receperint vos exeuntes in plateas eius dicite

¹¹ etiam pulverem qui adhesit nobis de civitate vestra extergimus in vos tamen hoc scitote quia adpropinquavit regnum Dei

¹² dico vobis quia Sodomis in die illa remissius erit quam illi civitati

¹³ vae tibi Corazain vae tibi Bethsaida quia si in Tyro et Sidone factae fuissent virtutes quae in vobis factae sunt olim in cilicio et cinere sedentes paeniterent

¹⁴ verumtamen Tyro et Sidoni remissius erit in iudicio quam vobis

¹⁵ et tu CapharNahum usque in caelum exaltata usque ad infernum demergeris

¹⁶ qui vos audit me audit et qui vos spernit me spernit qui autem me spernit spernit eum qui me misit

¹⁷ reversi sunt autem septuaginta duo cum gaudio dicentes Domine etiam daemonia subiciuntur nobis in nomine tuo

¹⁸ et ait illis videbam Satanan sicut fulgur de caelo cadentem

¹⁹ ecce dedi vobis potestatem calcandi supra serpentes et scorpiones et supra omnem virtutem inimici et nihil vobis nocebit

²⁰ verumtamen in hoc nolite gaudere quia spiritus vobis subiciuntur gaudete autem quod nomina vestra scripta sunt in caelis

²¹ in ipsa hora exultavit Spiritu Sancto et dixit confiteor tibi Pater Domine caeli et terrae quod abscondisti haec a sapientibus et prudentibus et revelasti ea parvulis etiam Pater quia sic placuit ante te

²² omnia mihi tradita sunt a Patre meo et nemo scit qui sit Filius nisi Pater et qui sit Pater nisi Filius et cui voluerit Filius revelare

²³ et conversus ad discipulos suos dixit beati oculi qui vident quae videtis

²⁴ dico enim vobis quod multi prophetae et reges voluerunt videre quae vos videtis et non viderunt et audire quae auditis et non audierunt

²⁵ et ecce quidam legis peritus surrexit temptans illum et dicens magister quid faciendo vitam aeternam possidebo

²⁶ at ille dixit ad eum in lege quid scriptum est quomodo legis

²⁷ ille respondens dixit diliges Dominum Deum tuum ex toto corde tuo et ex tota anima tua et ex omnibus viribus tuis et ex omni mente tua et proximum tuum sicut te ipsum

²⁸ dixitque illi recte respondisti hoc fac et vives

²⁹ ille autem volens iustificare se ipsum dixit ad Iesum et quis est meus proximus

³⁰ suscipiens autem Iesus dixit homo quidam descendebat ab Hierusalem in Hiericho et incidit in latrones qui etiam despoliaverunt eum et plagis inpositis abierunt semivivo relicto

³¹ accidit autem ut sacerdos quidam descenderet eadem via et viso illo praeterivit

³² similiter et Levita cum esset secus locum et videret eum pertransiit

³³ Samaritanus autem quidam iter faciens venit secus eum et videns eum misericordia motus est

³⁴ et adpropians alligavit vulnera eius infundens oleum et vinum et inponens illum in

iumentum suum duxit in stabulum et curam eius egit

³⁵ et altera die protulit duos denarios et dedit stabulario et ait curam illius habe et quodcumque supererogaveris ego cum rediero reddam tibi

³⁶ quis horum trium videtur tibi proximus fuisse illi qui incidit in latrones

³⁷ at ille dixit qui fecit misericordiam in illum et ait illi Iesus vade et tu fac similiter

³⁸ factum est autem dum irent et ipse intravit in quoddam castellum et mulier quaedam Martha nomine excepit illum in domum suam

³⁹ et huic erat soror nomine Maria quae etiam sedens secus pedes Domini audiebat verbum illius

⁴⁰ Martha autem satagebat circa frequens ministerium quae stetit et ait Domine non est tibi curae quod soror mea reliquit me solam ministrare dic ergo illi ut me adiuvet

⁴¹ et respondens dixit illi Dominus Martha Martha sollicita es et turbaris erga plurima

⁴² porro unum est necessarium Maria optimam partem elegit quae non auferetur ab ea

CAPITULUM 11

Et factum est cum esset in loco quodam orans ut cessavit dixit unus ex discipulis eius ad eum Domine doce nos orare sicut et Iohannes docuit discipulos suos

² et ait illis cum oratis dicite Pater sanctificetur nomen tuum adveniat regnum tuum

³ panem nostrum cotidianum da nobis cotidie

⁴ et dimitte nobis peccata nostra siquidem et ipsi dimittimus omni debenti nobis et ne nos inducas in temptationem

⁵ et ait ad illos quis vestrum habebit amicum et ibit ad illum media nocte et dicit illi amice commoda mihi tres panes

⁶ quoniam amicus meus venit de via ad me et non habeo quod ponam ante illum

⁷ et ille de intus respondens dicat noli mihi molestus esse iam ostium clausum est et pueri mei mecum sunt in cubili non possum surgere et dare tibi

⁸ dico vobis et si non dabit illi surgens eo quod amicus eius sit propter inprobritatem tamen eius surget et dabit illi quotquot habet necessarios

⁹ et ego vobis dico petite et dabitur vobis quaerite et invenietis pulsate et aperietur vobis

¹⁰ omnis enim qui petit accipit et qui quaerit invenit et pulsanti aperietur

¹¹ quis autem ex vobis patrem petet panem numquid lapidem dabit illi aut piscem numquid pro pisce serpentem dabit illi

¹² aut si petierit ovum numquid porriget illi scorpionem

¹³ si ergo vos cum sitis mali nostis bona data dare filiis vestris quanto magis Pater vester de caelo dabit spiritum bonum petentibus se

¹⁴ et erat eiciens daemonium et illud erat mutum et cum eiecisset daemonium locutus est mutus et admiratae sunt turbae

¹⁵ quidam autem ex eis dixerunt in Beelzebub principe daemoniorum eicit daemonia

¹⁶ et alii temptantes signum de caelo quaerebant ab eo

¹⁷ ipse autem ut vidit cogitationes eorum dixit eis omne regnum in se ipsum divisum desolatur et domus supra domum cadet

¹⁸ si autem et Satan in se ipsum divisus est quomodo stabit regnum ipsius quia dicitis in Beelzebub eicere me daemonia

¹⁹ si autem ego in Beelzebub eicio daemonia filii vestri in quo eiciunt ideo ipsi iudices

vestri erunt

20 porro si in digito Dei eicio daemona profecto praevenit in vos regnum Dei

21 cum fortis armatus custodit atrium suum in pace sunt ea quae possidet

22 si autem fortior illo superveniens vicerit eum universa arma eius aufert in quibus confidebat et spolia eius distribuit

23 qui non est mecum adversum me est et qui non colligit mecum dispergit

24 cum immundus spiritus exierit de homine perambulat per loca inaquosa quaerens requiem et non inveniens dicit revertar in domum meam unde exivi

25 et cum venerit invenit scopis mundatam

26 et tunc vadit et adsumit septem alios spiritus nequiores se et ingressi habitant ibi et sunt novissima hominis illius peiora prioribus

27 factum est autem cum haec diceret extollens vocem quaedam mulier de turba dixit illi beatus venter qui te portavit et ubera quae suxisti

28 at ille dixit quippini beati qui audiunt verbum Dei et custodiunt

29 turbis autem concurrentibus coepit dicere generatio haec generatio nequam est signum quaerit et signum non dabitur illi nisi signum Ionae

30 nam sicut Ionas fuit signum Ninevitis ita erit et Filius hominis generationi isti

31 regina austri surget in iudicio cum viris generationis huius et condemnabit illos quia venit a finibus terrae audire sapientiam Salomonis et ecce plus Salomone hic

32 viri ninevitae surgent in iudicio cum generatione hac et condemnabunt illam quia paenitentiam egerunt ad praedicationem Ionae et ecce plus Iona hic

33 nemo lucernam accendit et in abscondito ponit neque sub modio sed supra candelabrum ut qui ingrediuntur lumen videant

34 lucerna corporis tui est oculus tuus si oculus tuus fuerit simplex totum corpus tuum lucidum erit si autem nequam fuerit etiam corpus tuum tenebrosus erit

35 vide ergo ne lumen quod in te est tenebrae sint

36 si ergo corpus tuum totum lucidum fuerit non habens aliquam partem tenebrarum erit lucidum totum et sicut lucerna fulgoris inluminabit te

37 et cum loqueretur rogavit illum quidam Pharisaeus ut pranderet apud se et ingressus recubuit

38 Pharisaeus autem coepit intra se reputans dicere quare non baptizatus esset ante prandium

39 et ait Dominus ad illum nunc vos Pharisei quod de foris est calicis et catini mundatis quod autem intus est vestrum plenum est rapina et iniquitate

40 stulti nonne qui fecit quod de foris est etiam id quod de intus est fecit

41 verumtamen quod superest date elemosynam et ecce omnia munda sunt vobis

42 sed vae vobis Phariseis quia decimatis mentam et rutam et omne holus et praeteritis iudicium et caritatem Dei haec autem oportuit facere et illa non omittere

43 vae vobis Phariseis quia diligitis primas cathedras in synagogis et salutationes in foro

44 vae vobis quia estis ut monumenta quae non parent et homines ambulantes supra nesciunt

45 respondens autem quidam ex legis peritis ait illi magister haec dicens etiam nobis contumeliam facis

46 at ille ait et vobis legis peritis vae quia oneratis homines oneribus quae portari non possunt et ipsi uno digito vestro non tangitis sarcinas

- ⁴⁷ vae vobis quia aedificatis monumenta prophetarum patres autem vestri occiderunt illos
- ⁴⁸ profecto testificamini quod consentitis operibus patrum vestrorum quoniam quidem ipsi eos occiderunt vos autem aedificatis eorum sepulchra
- ⁴⁹ propterea et sapientia Dei dixit mittam ad illos prophetas et apostolos et ex illis occident et persequentur
- ⁵⁰ ut inquiratur sanguis omnium prophetarum qui effusus est a constitutione mundi a generatione ista
- ⁵¹ a sanguine Abel usque ad sanguinem Zacchariae qui periit inter altare et aedem ita dico vobis requiretur ab hac generatione
- ⁵² vae vobis legis peritis quia tulistis clavem scientiae ipsi non introistis et eos qui introibant prohibuistis
- ⁵³ cum haec ad illos diceret coeperunt Pharisei et legis periti graviter insistere et os eius opprimere de multis
- ⁵⁴ insidiantes et quaerentes capere aliquid ex ore eius ut accusarent eum

CAPITULUM 12

- m**ultis autem turbis circumstantibus ita ut se invicem conculcarent coepit dicere ad discipulos suos adtendite a fermento Pharisaeorum quae est hypocrisis
- ² nihil autem opertum est quod non reveletur neque absconditum quod non sciatur
- ³ quoniam quae in tenebris dixistis in lumine dicentur et quod in aurem locuti estis in cubiculis praedicabitur in tectis
- ⁴ dico autem vobis amicis meis ne terreamini ab his qui occidunt corpus et post haec non habent amplius quod faciant
- ⁵ ostendam autem vobis quem timeatis timete eum qui postquam occiderit habet potestatem mittere in gehennam ita dico vobis hunc timeate
- ⁶ nonne quinque passeret veneunt dipundio et unus ex illis non est in oblivione coram Deo
- ⁷ sed et capilli capitis vestri omnes numerati sunt nolite ergo timere multis passeribus pluri estis
- ⁸ dico autem vobis omnis quicumque confessus fuerit in me coram hominibus et Filius hominis confitebitur in illo coram angelis Dei
- ⁹ qui autem negaverit me coram hominibus denegabitur coram angelis Dei
- ¹⁰ et omnis qui dicit verbum in Filium hominis remittetur illi ei autem qui in Spiritum Sanctum blasphemaverit non remittetur
- ¹¹ cum autem inducent vos in synagogas et ad magistratus et potestates nolite solliciti esse qualiter aut quid respondeatis aut quid dicatis
- ¹² Spiritus enim Sanctus docebit vos in ipsa hora quae oporteat dicere
- ¹³ ait autem quidam ei de turba magister dic fratri meo ut dividat mecum hereditatem
- ¹⁴ at ille dixit ei homo quis me constituit iudicem aut divisorem super vos
- ¹⁵ dixitque ad illos videte et cavete ab omni avaritia quia non in abundantia cuiusquam vita eius est ex his quae possidet
- ¹⁶ dixit autem similitudinem ad illos dicens hominis cuiusdam divitis uberes fructus ager adtulit
- ¹⁷ et cogitabat intra se dicens quid faciam quod non habeo quo congregem fructus meos

18 et dixit hoc faciam destruam horrea mea et maiora faciam et illuc congregabo omnia quae nata sunt mihi et bona mea

19 et dicam animae meae anima habes multa bona posita in annos plurimos requiesce comede bibe epulare

20 dixit autem illi Deus stulte hac nocte animam tuam repetunt a te quae autem parasti cuius erunt

21 sic est qui sibi thesaurizat et non est in Deum dives

22 dixitque ad discipulos suos ideo dico vobis nolite solliciti esse animae quid manducetis neque corpori quid vestiamini

23 anima plus est quam esca et corpus quam vestimentum

24 considerate corvos quia non seminant neque metunt quibus non est cellarium neque horreum et Deus pascit illos quanto magis vos pluris estis illis

25 quis autem vestrum cogitando potest adicere ad staturam suam cubitum unum

26 si ergo neque quod minimum est potestis quid de ceteris solliciti estis

27 considerate lilia quomodo crescunt non laborant non nent dico autem vobis nec Salomon in omni gloria sua vestiebatur sicut unum ex istis

28 si autem faenum quod hodie in agro est et cras in clibanum mittitur Deus sic vestit quanto magis vos pusillae fidei

29 et vos nolite quaerere quid manducetis aut quid bibatis et nolite in sublime tolli

30 haec enim omnia gentes mundi quaerunt Pater autem vester scit quoniam his indigetis

31 verumtamen quaerite regnum Dei et haec omnia adicientur vobis

32 nolite timere pusillus grex quia conplacuit Patri vestro dare vobis regnum

33 vendite quae possidetis et date elemosynam facite vobis sacculos qui non veterescunt thesaurum non deficientem in caelis quo fur non adpropiat neque tinea corrumpit

34 ubi enim thesaurus vester est ibi et cor vestrum erit

35 sint lumbi vestri praecincti et lucernae ardentes

36 et vos similes hominibus expectantibus dominum suum quando revertatur a nuptiis ut cum venerit et pulsaverit confestim aperiant ei

37 beati servi illi quos cum venerit dominus invenerit vigilantes amen dico vobis quod praecinget se et faciet illos discumbere et transiens ministrabit illis

38 et si venerit in secunda vigilia et si in tertia vigilia venerit et ita invenerit beati sunt servi illi

39 hoc autem scitote quia si sciret pater familias qua hora fur veniret vigilaret utique et non sineret perfodiri domum suam

40 et vos estote parati quia qua hora non putatis Filius hominis venit

41 ait autem ei Petrus Domine ad nos dicis hanc parabolam an et ad omnes

42 dixit autem Dominus quis putas est fidelis dispensator et prudens quem constituet dominus super familiam suam ut det illis in tempore tritici mensuram

43 beatus ille servus quem cum venerit dominus invenerit ita facientem

44 vere dico vobis quia supra omnia quae possidet constituet illum

45 quod si dixerit servus ille in corde suo moram facit dominus meus venire et coeperit percutere pueros et ancillas et edere et bibere et inebriari

46 veniet dominus servi illius in die qua non sperat et hora qua nescit et dividet eum partemque eius cum infidelibus ponet

47 ille autem servus qui cognovit voluntatem domini sui et non praeparavit et non fecit

secundum voluntatem eius vapulabit multas

48 qui autem non cognovit et fecit digna plagis vapulabit paucis omni autem cui multum datum est multum quaeretur ab eo et cui commendaverunt multum plus petent ab eo

49 ignem veni mittere in terram et quid volo si accendatur

50 baptisma autem habeo baptizari et quomodo coartor usque dum perficiatur

51 putatis quia pacem veni dare in terram non dico vobis sed separationem

52 erunt enim ex hoc quinque in domo una divisi tres in duo et duo in tres

53 dividuntur pater in filium et filius in patrem suum mater in filiam et filia in matrem socrus in nurum suam et nurus in socrum suam

54 dicebat autem et ad turbas cum videritis nubem orientem ab occasu statim dicitis nimbus venit et ita fit

55 et cum austrum flantem dicitis quia aestus erit et fit

56 hypocritae faciem terrae et caeli nostis probare hoc autem tempus quomodo non probatis

57 quid autem et a vobis ipsis non iudicatis quod iustum est

58 cum autem vadis cum adversario tuo ad principem in via da operam liberari ab illo ne forte trahat te apud iudicem et iudex tradat te exactori et exactor mittat te in carcerem

59 dico tibi non exies inde donec etiam novissimum minutum reddas

CAPITULUM 13

aderant autem quidam ipso in tempore nuntiantes illi de Galilaeis quorum sanguinem Pilatus miscuit cum sacrificiis eorum

2 et respondens dixit illis putatis quod hii Galilaei prae omnibus Galilaeis peccatores fuerunt quia talia passi sunt

3 non dico vobis sed nisi paenitentiam habueritis omnes similiter peribitis

4 sicut illi decem et octo supra quos cecidit turris in Siloam et occidit eos putatis quia et ipsi debitores fuerunt praeter omnes homines habitantes in Hierusalem

5 non dico vobis sed si non paenitentiam egeritis omnes similiter peribitis

6 dicebat autem hanc similitudinem arborem fici habebat quidam plantatam in vinea sua et venit quaerens fructum in illa et non invenit

7 dixit autem ad cultorem vineae ecce anni tres sunt ex quo venio quaerens fructum in ficulnea hac et non invenio succide ergo illam ut quid etiam terram occupat

8 at ille respondens dixit illi domine dimitte illam et hoc anno usque dum fodiam circa illam et mittam stercora

9 et si quidem fecerit fructum sin autem in futurum succides eam

10 erat autem docens in synagoga eorum sabbatis

11 et ecce mulier quae habebat spiritum infirmitatis annis decem et octo et erat inclinata nec omnino poterat sursum respicere

12 quam cum videret Iesus vocavit ad se et ait illi mulier dimissa es ab infirmitate tua

13 et inposuit illi manus et confestim erecta est et glorificabat Deum

14 respondens autem archisynagogus indignans quia sabbato curasset Iesus dicebat turbae sex dies sunt in quibus oportet operari in his ergo venite et curamini et non in die sabbati

15 respondit autem ad illum Dominus et dixit hypocritae unusquisque vestrum sabbato non

solvit bovem suum aut asinum a praesepio et ducit adaquare

16 hanc autem filiam Abrahae quam alligavit Satanas ecce decem et octo annis non oportuit solvi a vinculo isto die sabbati

17 et cum haec diceret erubescabant omnes adversarii eius et omnis populus gaudebat in universis quae gloriose fiebant ab eo

18 dicebat ergo cui simile est regnum Dei et cui simile esse existimabo illud

19 simile est grano sinapis quod acceptum homo misit in hortum suum et crevit et factum est in arborem magnam et volucres caeli requieverunt in ramis eius

20 et iterum dixit cui simile aestimabo regnum Dei

21 simile est fermento quod acceptum mulier abscondit in farinae sata tria donec fermentaretur totum

22 et ibat per civitates et castella docens et iter faciens in Hierusalem

23 ait autem illi quidam Domine si pauci sunt qui salvantur ipse autem dixit ad illos

24 contendite intrare per angustam portam quia multi dico vobis quaerunt intrare et non poterunt

25 cum autem intraverit pater familias et cluserit ostium et incipietis foris stare et pulsare ostium dicentes Domine aperi nobis et respondens dicet vobis nescio vos unde sitis

26 tunc incipietis dicere manducavimus coram te et bibimus et in plateis nostris docuisti

27 et dicet vobis nescio vos unde sitis discedite a me omnes operarii iniquitatis

28 ibi erit fletus et stridor dentium cum videritis Abraham et Isaac et Iacob et omnes prophetas in regno Dei vos autem expelli foras

29 et venient ab oriente et occidente et aquilone et austro et accumbent in regno Dei

30 et ecce sunt novissimi qui erunt primi et sunt primi qui erunt novissimi

31 in ipsa die accesserunt quidam Phariseeorum dicentes illi exi et vade hinc quia Herodes vult te occidere

32 et ait illis ite dicite vulpi illi ecce eicio daemonia et sanitates perficio hodie et cras et tertia consummor

33 verumtamen oportet me hodie et cras et sequenti ambulare quia non capit prophetam perire extra Hierusalem

34 Hierusalem Hierusalem quae occidis prophetas et lapidas eos qui mittuntur ad te quotiens volui congregare filios tuos quemadmodum avis nidum suum sub pinnis et noluisti

35 ecce relinquitur vobis domus vestra dico autem vobis quia non videbitis me donec veniat cum dicetis benedictus qui venit in nomine Domini

CAPITULUM 14

Et factum est cum intraret in domum cuiusdam principis Phariseeorum sabbato manducare panem et ipsi observabant eum

2 et ecce homo quidam hydropicus erat ante illum

3 et respondens Iesus dixit ad legis peritos et Phariseeos dicens si licet sabbato curare

4 at illi tacuerunt ipse vero adprehensum sanavit eum ac dimisit

5 et respondens ad illos dixit cuius vestrum asinus aut bos in puteum cadet et non continuo extrahet illum die sabbati

6 et non poterant ad haec respondere illi

⁷ dicebat autem et ad invitatos parabolam intendens quomodo primos accubitus eligerent dicens ad illos

⁸ cum invitatus fueris ad nuptias non discumbas in primo loco ne forte honoratior te sit invitatus ab eo

⁹ et veniens is qui te et illum vocavit dicat tibi da huic locum et tunc incipias cum rubore novissimum locum tenere

¹⁰ sed cum vocatus fueris vade recumbe in novissimo loco ut cum venerit qui te invitavit dicat tibi amice ascende superius tunc erit tibi gloria coram simul discumbentibus

¹¹ quia omnis qui se exaltat humiliabitur et qui se humiliat exaltabitur

¹² dicebat autem et ei qui se invitaverat cum facis prandium aut cenam noli vocare amicos tuos neque fratres tuos neque cognatos neque vicinos divites ne forte et ipsi te reinvitent et fiat tibi retributio

¹³ sed cum facis convivium voca pauperes debiles claudos caecos

¹⁴ et beatus eris quia non habent retribuere tibi retribuetur enim tibi in resurrectione iustorum

¹⁵ haec cum audisset quidam de simul discumbentibus dixit illi beatus qui manducabit panem in regno Dei

¹⁶ at ipse dixit ei homo quidam fecit cenam magnam et vocavit multos

¹⁷ et misit servum suum hora cenae dicere invitatis ut venirent quia iam parata sunt omnia

¹⁸ et coeperunt simul omnes excusare primus dixit ei villam emi et necesse habeo exire et videre illam rogo te habe me excusatum

¹⁹ et alter dixit iuga boum emi quinque et eo probare illa rogo te habe me excusatum

²⁰ et alius dixit uxorem duxi et ideo non possum venire

²¹ et reversus servus nuntiavit haec domino suo tunc iratus pater familias dixit servo suo exi cito in plateas et vicos civitatis et pauperes ac debiles et caecos et claudos introduc huc

²² et ait servus domine factum est ut imperasti et adhuc locus est

²³ et ait dominus servo exi in vias et sepes et conpelle intrare ut impleatur domus mea

²⁴ dico autem vobis quod nemo virorum illorum qui vocati sunt gustabit cenam meam

²⁵ ibant autem turbae multae cum eo et conversus dixit ad illos

²⁶ si quis venit ad me et non odit patrem suum et matrem et uxorem et filios et fratres et sorores adhuc autem et animam suam non potest esse meus discipulus

²⁷ et qui non baiulat crucem suam et venit post me non potest esse meus discipulus

²⁸ quis enim ex vobis volens turrem aedificare non prius sedens computat sumptus qui necessarii sunt si habet ad perficiendum

²⁹ ne posteaquam posuerit fundamentum et non potuerit perficere omnes qui vident incipiant inludere ei

³⁰ dicentes quia hic homo coepit aedificare et non potuit consummare

³¹ aut qui rex iturus committere bellum adversus alium regem non sedens prius cogitat si possit cum decem milibus occurrere ei qui cum viginti milibus venit ad se

³² alioquin adhuc illo longe agente legationem mittens rogat ea quae pacis sunt

³³ sic ergo omnis ex vobis qui non renuntiat omnibus quae possidet non potest meus esse discipulus

³⁴ bonum est sal si autem sal quoque evanuerit in quo condietur

³⁵ neque in terram neque in sterquilinum utile est sed foras mittetur qui habet aures audiendi audiat

CAPITULUM 15

Erant autem adpropinquantes ei publicani et peccatores ut audirent illum

² et murmurabant Pharisei et scribae dicentes quia hic peccatores recipit et manducat cum illis

³ et ait ad illos parabolam istam dicens

⁴ quis ex vobis homo qui habet centum oves et si perdiderit unam ex illis nonne dimittit nonaginta novem in deserto et vadit ad illam quae perierat donec inveniatur illam

⁵ et cum invenerit eam inponit inumeros suos gaudens

⁶ et veniens domum convocat amicos et vicinos dicens illis congratulamini mihi quia inveni ovem meam quae perierat

⁷ dico vobis quod ita gaudium erit in caelo super uno peccatore paenitentiam habente quam super nonaginta novem iustis qui non indigent paenitentia

⁸ aut quae mulier habens dragmas decem si perdiderit dragmam unam nonne accendit lucernam et everrit domum et quaerit diligenter donec inveniatur

⁹ et cum invenerit convocat amicas et vicinas dicens congratulamini mihi quia inveni dragmam quam perdideram

¹⁰ ita dico vobis gaudium erit coram angelis Dei super uno peccatore paenitentiam agente

¹¹ ait autem homo quidam habuit duos filios

¹² et dixit adulescentior ex illis patri pater da mihi portionem substantiae quae me contingit et divisit illis substantiam

¹³ et non post multos dies congregatis omnibus adulescentior filius peregre profectus est in regionem longinquam et ibi dissipavit substantiam suam vivendo luxuriose

¹⁴ et postquam omnia consummasset facta est fames valida in regione illa et ipse coepit egere

¹⁵ et abiit et adhesit uni civium regionis illius et misit illum in villam suam ut pasceret porcos

¹⁶ et cupiebat implere ventrem suum de siliquis quas porci manducabant et nemo illi dabat

¹⁷ in se autem reversus dixit quanti mercennarii patris mei abundant panibus ego autem hic fame pereor

¹⁸ surgam et ibo ad patrem meum et dicam illi pater peccavi in caelum et coram te

¹⁹ et iam non sum dignus vocari filius tuus fac me sicut unum de mercennariis tuis

²⁰ et surgens venit ad patrem suum cum autem adhuc longe esset vidit illum pater ipsius et misericordia motus est et adcurrens cecidit supra collum eius et osculatus est illum

²¹ dixitque ei filius pater peccavi in caelum et coram te iam non sum dignus vocari filius tuus

²² dixit autem pater ad servos suos cito proferte stolam primam et induite illum et date anulum in manum eius et calciamenta in pedes

²³ et adducite vitulum saginatum et occidite et manducemus et epulemur

²⁴ quia hic filius meus mortuus erat et revixit perierat et inventus est et coeperunt epulari

²⁵ erat autem filius eius senior in agro et cum veniret et adpropinquaret domui audivit

symphoniam et chorum

²⁶ et vocavit unum de servis et interrogavit quae haec essent

²⁷ isque dixit illi frater tuus venit et occidit pater tuus vitulum saginatum quia salvum illum recepit

²⁸ indignatus est autem et nolebat introire pater ergo illius egressus coepit rogare illum

²⁹ at ille respondens dixit patri suo ecce tot annis servio tibi et numquam mandatum tuum praeterii et numquam dedisti mihi hedum ut cum amicis meis epularer

³⁰ sed postquam filius tuus hic qui devoravit substantiam suam cum meretricibus venit occidisti illi vitulum saginatum

³¹ at ipse dixit illi fili tu semper mecum es et omnia mea tua sunt

³² epulari autem et gaudere oportebat quia frater tuus hic mortuus erat et revixit perierat et inventus est

CAPITULUM 16

dicebat autem et ad discipulos suos homo quidam erat dives qui habebat vilicum et hic diffamatus est apud illum quasi dissipasset bona ipsius

² et vocavit illum et ait illi quid hoc audio de te redde rationem vilicationis tuae iam enim non poteris vilicare

³ ait autem vilicus intra se quid faciam quia dominus meus aufert a me vilicationem fodere non valeo mendicare erubesco

⁴ scio quid faciam ut cum amotus fuero a vilicatione recipiant me in domos suas

⁵ convocatis itaque singulis debitoribus domini sui dicebat primo quantum debes domino meo

⁶ at ille dixit centum cados olei dixitque illi accipe cautionem tuam et sede cito scribe quinquaginta

⁷ deinde alio dixit tu vero quantum debes qui ait centum choros tritici ait illi accipe litteras tuas et scribe octoginta

⁸ et laudavit dominus vilicum iniquitatis quia prudenter fecisset quia filii huius saeculi prudentiores filiis lucis in generatione sua sunt

⁹ et ego vobis dico facite vobis amicos de mamona iniquitatis ut cum defeceritis recipiant vos in aeterna tabernacula

¹⁰ qui fidelis est in minimo et in maiori fidelis est et qui in modico iniquus est et in maiori iniquus est

¹¹ si ergo in iniquo mamona fideles non fuistis quod verum est quis credet vobis

¹² et si in alieno fideles non fuistis quod vestrum est quis dabit vobis

¹³ nemo servus potest duobus dominis servire aut enim unum odiet et alterum diligit aut uni adhaerebit et alterum contemnet non potestis Deo servire et mamonae

¹⁴ audiebant autem omnia haec Pharisaei qui erant avari et deridebant illum

¹⁵ et ait illis vos estis qui iustificatis vos coram hominibus Deus autem novit corda vestra quia quod hominibus altum est abominatio est ante Deum

¹⁶ lex et prophetae usque ad Iohannem ex eo regnum Dei evangelizatur et omnis in illud vim facit

¹⁷ facilius est autem caelum et terram praeterire quam de lege unum apicem cadere

¹⁸ omnis qui dimittit uxorem suam et ducit alteram moechatur et qui dimissam a viro ducit

moechatur

- 19** homo quidam erat dives et induebatur purpura et bysso et epulabatur cotidie splendide
20 et erat quidam mendicus nomine Lazarus qui iacebat ad ianuam eius ulceribus plenus
21 cupiens saturari de micis quae cadebant de mensa divitis sed et canes veniebant et lingeabant ulcera eius
22 factum est autem ut moreretur mendicus et portaretur ab angelis in sinum Abrahae mortuus est autem et dives et sepultus est in inferno
23 elevans oculos suos cum esset in tormentis videbat Abraham a longe et Lazarum in sinu eius
24 et ipse clamans dixit pater Abraham miserere mei et mitte Lazarum ut intinguat extremum digiti sui in aqua ut refrigeret linguam meam quia crucior in hac flamma
25 et dixit illi Abraham fili recordare quia recepisti bona in vita tua et Lazarus similiter mala nunc autem hic consolatur tu vero cruciaris
26 et in his omnibus inter nos et vos chasma magnum firmatum est ut hii qui volunt hinc transire ad vos non possint neque inde huc transmeare
27 et ait rogo ergo te pater ut mittas eum in domum patris mei
28 habeo enim quinque fratres ut testetur illis ne et ipsi veniant in locum hunc tormentorum
29 et ait illi Abraham habent Mosen et prophetas audiant illos
30 at ille dixit non pater Abraham sed si quis ex mortuis ierit ad eos paenitentiam agent
31 ait autem illi si Mosen et prophetas non audiunt neque si quis ex mortuis resurrexerit credent

CAPITULUM 17

- E**t ad discipulos suos ait impossibile est ut non veniant scandala vae autem illi per quem veniunt
2 utilius est illi si lapis molaris inponatur circa collum eius et proiciatur in mare quam ut scandalizet unum de pusillis istis
3 attendite vobis si peccaverit frater tuus increpa illum et si paenitentiam egerit dimitte illi
4 et si septies in die peccaverit in te et septies in die conversus fuerit ad te dicens paenitet me dimitte illi
5 et dixerunt apostoli Domino adauge nobis fidem
6 dixit autem Dominus si haberetis fidem sicut granum sinapis diceretis huic arbori moro eradicare et transplantare in mare et oboediret vobis
7 quis autem vestrum habens servum arantem aut pascentem qui regresso de agro dicet illi statim transi recumbe
8 et non dicet ei para quod cenem et praecinge te et ministra mihi donec manducem et bibam et post haec tu manducabis et bibes
9 numquid gratiam habet servo illi quia fecit quae sibi imperaverat non puto
10 sic et vos cum feceritis omnia quae praecepta sunt vobis dicite servi inutiles sumus quod debuimus facere fecimus
11 et factum est dum iret in Hierusalem transiebat per mediam Samariam et Galilaeam
12 et cum ingrederetur quoddam castellum occurrerunt ei decem viri leprosi qui steterunt a longe
13 et levaverunt vocem dicentes Iesu praeceptor miserere nostri

14 quos ut vidit dixit ite ostendite vos sacerdotibus et factum est dum irent mundati sunt
15 unus autem ex illis ut vidit quia mundatus est regressus est cum magna voce magnificans Deum
16 et cecidit in faciem ante pedes eius gratias agens et hic erat Samaritanus
17 respondens autem Iesus dixit nonne decem mundati sunt et novem ubi sunt
18 non est inventus qui rediret et daret gloriam Deo nisi hic alienigena
19 et ait illi surge vade quia fides tua te salvum fecit
20 interrogatus autem a Phariseis quando venit regnum Dei respondit eis et dixit non venit regnum Dei cum observatione
21 neque dicent ecce hic aut ecce illic ecce enim regnum Dei intra vos est
22 et ait ad discipulos venient dies quando desideretis videre unum diem Filii hominis et non videbitis
23 et dicent vobis ecce hic ecce illic nolite ire neque sectemini
24 nam sicut fulgur coruscans de sub caelo in ea quae sub caelo sunt fulget ita erit Filius hominis in die sua
25 primum autem oportet illum multa pati et reprobari a generatione hac
26 et sicut factum est in diebus Noe ita erit et in diebus Filii hominis
27 edebant et bibebant uxores ducebant et dabantur ad nuptias usque in diem qua intravit Noe in arcam et venit diluvium et perdidit omnes
28 similiter sicut factum est in diebus Loth edebant et bibebant emebant et vendebant plantabant aedificabant
29 qua die autem exiit Loth a Sodomis pluit ignem et sulphur de caelo et omnes perdidit
30 secundum haec erit qua die Filius hominis revelabitur
31 in illa hora qui fuerit in tecto et vasa eius in domo ne descendat tollere illa et qui in agro similiter non redeat retro
32 memores estote uxoris Loth
33 quicumque quaesierit animam suam salvare perdet illam et qui perdiderit illam vivificabit eam
34 dico vobis illa nocte erunt duo in lecto uno unus adsumetur et alter relinquetur
35 duae erunt molentes in unum una adsumetur et altera relinquetur duo in agro unus adsumetur et alter relinquetur
36 respondentes dicunt illi ubi Domine
37 qui dixit eis ubicumque fuerit corpus illuc congregabuntur aquilae

CAPITULUM 18

dicebat autem et parabolam ad illos quoniam oportet semper orare et non deficere
2 dicens iudex quidam erat in quadam civitate qui Deum non timebat et hominem non verebatur
3 vidua autem quaedam erat in civitate illa et veniebat ad eum dicens vindica me de adversario meo
4 et nolebat per multum tempus post haec autem dixit intra se et si Deum non timeo nec hominem revereor
5 tamen quia molesta est mihi haec vidua vindicabo illam ne in novissimo veniens suggillet me

⁶ ait autem Dominus audite quid iudex iniquitatis dicit

⁷ Deus autem non faciet vindictam electorum suorum clamantium ad se die ac nocte et patientiam habebit in illis

⁸ dico vobis quia cito faciet vindictam illorum verumtamen Filius hominis veniens putas inveniet fidem in terra

⁹ dixit autem et ad quosdam qui in se confidebant tamquam iusti et aspernabantur ceteros parabolam istam

¹⁰ duo homines ascenderunt in templum ut orarent unus Phariseus et alter publicanus

¹¹ Phariseus stans haec apud se orabat Deus gratias ago tibi quia non sum sicut ceteri hominum raptores iniusti adulteri vel ut etiam hic publicanus

¹² ieiuno bis in sabbato decimas do omnium quae possideo

¹³ et publicanus a longe stans nolebat nec oculos ad caelum levare sed percutiebat pectus suum dicens Deus propitius esto mihi peccatori

¹⁴ dico vobis descendit hic iustificatus in domum suam ab illo quia omnis qui se exaltat humiliabitur et qui se humiliat exaltabitur

¹⁵ adferebant autem ad illum et infantes ut eos tangeret quod cum viderent discipuli increpabant illos

¹⁶ Iesus autem convocans illos dixit sinite pueros venire ad me et nolite eos vetare talium est enim regnum Dei

¹⁷ amen dico vobis quicumque non acceperit regnum Dei sicut puer non intrabit in illud

¹⁸ et interrogavit eum quidam princeps dicens magister bone quid faciens vitam aeternam possidebo

¹⁹ dixit autem ei Iesus quid me dicis bonum nemo bonus nisi solus Deus

²⁰ mandata nosti non occides non moechaberis non furtum facies non falsum testimonium dices honora patrem tuum et matrem

²¹ qui ait haec omnia custodivi a iuventute mea

²² quo audito Iesus ait ei adhuc unum tibi deest omnia quaecumque habes vende et da pauperibus et habebis thesaurum in caelo et veni sequere me

²³ his ille auditis contristatus est quia dives erat valde

²⁴ videns autem illum Iesus tristem factum dixit quam difficile qui pecunias habent in regnum Dei intrabunt

²⁵ facilius est enim camelum per foramen acus transire quam divitem intrare in regnum Dei

²⁶ et dixerunt qui audiebant et quis potest salvus fieri

²⁷ ait illis quae impossibilia sunt apud homines possible sunt apud Deum

²⁸ ait autem Petrus ecce nos dimisimus omnia et secuti sumus te

²⁹ qui dixit eis amen dico vobis nemo est qui relinquit domum aut parentes aut fratres aut uxorem aut filios propter regnum Dei

³⁰ et non recipiat multo plura in hoc tempore et in saeculo venturo vitam aeternam

³¹ adsumpsit autem Iesus duodecim et ait illis ecce ascendimus Hierosolyma et consummabuntur omnia quae scripta sunt per prophetas de Filio hominis

³² tradetur enim gentibus et inludetur et flagellabitur et conspuetur

³³ et postquam flagellaverint occident eum et die tertia resurget

³⁴ et ipsi nihil horum intellexerunt et erat verbum istud absconditum ab eis et non intellegebant quae dicebantur

³⁵ factum est autem cum adpropinquaret Hiericho caecus quidam sedebat secus viam mendicans
³⁶ et cum audiret turbam praetereuntem interrogabat quid hoc esset
³⁷ dixerunt autem ei quod Iesus Nazarenus transiret
³⁸ et clamavit dicens Iesu Fili David miserere mei
³⁹ et qui praeibant increpabant eum ut taceret ipse vero multo magis clamabat Fili David miserere mei
⁴⁰ stans autem Iesus iussit illum adduci ad se et cum adpropinquasset interrogavit illum
⁴¹ dicens quid tibi vis faciam at ille dixit Domine ut videam
⁴² et Iesus dixit illi respice fides tua te salvum fecit
⁴³ et confestim vidit et sequebatur illum magnificans Deum et omnis plebs ut vidit dedit laudem Deo

CAPITULUM 19

Et ingressus perambulabat Hiericho
² et ecce vir nomine Zaccheus et hic erat princeps publicanorum et ipse dives
³ et quaerebat videre Iesum quis esset et non poterat prae turba quia statura pusillus erat
⁴ et praecurrens ascendit in arborem sycomorum ut videret illum quia inde erat transiturus
⁵ et cum venisset ad locum suspiciens Iesus vidit illum et dixit ad eum Zacchee festinans descende quia hodie in domo tua oportet me manere
⁶ et festinans descendit et excepit illum gaudens
⁷ et cum viderent omnes murmurabant dicentes quod ad hominem peccatorem devertisset
⁸ stans autem Zaccheus dixit ad Dominum ecce dimidium bonorum meorum Domine do pauperibus et si quid aliquem defraudavi reddo quadruplum
⁹ ait Iesus ad eum quia hodie salus domui huic facta est eo quod et ipse filius sit Abrahae
¹⁰ venit enim Filius hominis quaerere et salvum facere quod perierat
¹¹ haec illis audientibus adiciens dixit parabolam eo quod esset prope Hierusalem et quia existimarent quod confestim regnum Dei manifestaretur
¹² dixit ergo homo quidam nobilis abiit in regionem longinquam accipere sibi regnum et reverti
¹³ vocatis autem decem servis suis dedit illis decem mnas et ait ad illos negotiamini dum venio
¹⁴ cives autem eius oderant illum et miserunt legationem post illum dicentes nolumus hunc regnare super nos
¹⁵ et factum est ut rediret accepto regno et iussit vocari servos quibus dedit pecuniam ut sciret quantum quisque negotiatus esset
¹⁶ venit autem primus dicens domine mna tua decem mnas adquisivit
¹⁷ et ait illi euge bone serve quia in modico fidelis fuisti eris potestatem habens supra decem civitates
¹⁸ et alter venit dicens domine mna tua fecit quinque mnas
¹⁹ et huic ait et tu esto supra quinque civitates
²⁰ et alter venit dicens domine ecce mna tua quam habui repositam in sudario
²¹ timui enim te quia homo austeris es tollis quod non posuisti et metis quod non

seminasti

22 dicit ei de ore tuo te iudico serve nequam sciebas quod ego austeris homo sum tollens quod non posui et metens quod non seminavi

23 et quare non dedisti pecuniam meam ad mensam et ego veniens cum usuris utique exegissem illud

24 et adstantibus dixit auferte ab illo mnam et date illi qui decem mnas habet

25 et dixerunt ei domine habet decem mnas

26 dico autem vobis quia omni habenti dabitur ab eo autem qui non habet et quod habet auferetur ab eo

27 verumtamen inimicos meos illos qui noluerunt me regnare super se adducite huc et interficite ante me

28 et his dictis praecedebat ascendens in Hierosolyma

29 et factum est cum adpropinquasset ad Bethfage et Bethania ad montem qui vocatur Oliveti misit duos discipulos suos

30 dicens ite in castellum quod contra est in quod introeuntes invenietis pullum asinae alligatum cui nemo umquam hominum sedit solvite illum et adducite

31 et si quis vos interrogaverit quare solvitis sic dicetis ei quia Dominus operam eius desiderat

32 abierunt autem qui missi erant et invenerunt sicut dixit illis stantem pullum

33 solventibus autem illis pullum dixerunt domini eius ad illos quid solvitis pullum

34 at illi dixerunt quia Dominus eum necessarium habet

35 et duxerunt illum ad Iesum et iactantes vestimenta sua supra pullum inposuerunt Iesum

36 eunte autem illo substernebant vestimenta sua in via

37 et cum adpropinquaret iam ad descensum montis Oliveti coeperunt omnes turbae discentium gaudentes laudare Deum voce magna super omnibus quas viderant virtutibus

38 dicentes benedictus qui venit rex in nomine Domini pax in caelo et gloria in excelsis

39 et quidam Pharisaeorum de turbis dixerunt ad illum magister increpa discipulos tuos

40 quibus ipse ait dico vobis quia si hii tacuerint lapides clamabunt

41 et ut adpropinquavit videns civitatem flevit super illam dicens

42 quia si cognovisses et tu et quidem in hac die tua quae ad pacem tibi nunc autem abscondita sunt ab oculis tuis

43 quia venient dies in te et circumdabunt te inimici tui vallo et circumdabunt te et coangustabunt te undique

44 ad terram prosternent te et filios qui in te sunt et non relinquent in te lapidem super lapidem eo quod non cognoveris tempus visitationis tuae

45 et ingressus in templum coepit eicere vendentes in illo et ementes

46 dicens illis scriptum est quia domus mea domus orationis est vos autem fecistis illam speluncam latronum

47 et erat docens cotidie in templo principes autem sacerdotum et scribae et principes plebis quaerebant illum perdere

48 et non inveniebant quid facerent illi omnis enim populus suspensus erat audiens illum

CAPITULUM 20

Et factum est in una dierum docente illo populum in templo et evangelizante convenerunt principes sacerdotum et scribae cum senioribus

2 et aiunt dicentes ad illum dic nobis in qua potestate haec facis aut quis est qui dedit tibi hanc potestatem

3 respondens autem dixit ad illos interrogabo vos et ego verbum respondete mihi

4 baptismum Iohannis de caelo erat an ex hominibus

5 at illi cogitabant inter se dicentes quia si dixerimus de caelo dicet quare ergo non credidistis illi

6 si autem dixerimus ex hominibus plebs universa lapidabit nos certi sunt enim Iohannem prophetam esse

7 et responderunt se nescire unde esset

8 et Iesus ait illis neque ego dico vobis in qua potestate haec facio

9 coepit autem dicere ad plebem parabolam hanc homo plantavit vineam et locavit eam colonis et ipse peregre fuit multis temporibus

10 et in tempore misit ad cultores servum ut de fructu vineae darent illi qui caesum dimiserunt eum inanem

11 et addidit alterum servum mittere illi autem hunc quoque caedentes et adficientes contumelia dimiserunt inanem

12 et addidit tertium mittere qui et illum vulnerantes eiecerunt

13 dixit autem dominus vineae quid faciam mittam filium meum dilectum forsitan cum hunc viderint verebuntur

14 quem cum vidissent coloni cogitaverunt inter se dicentes hic est heres occidamus illum ut nostra fiat hereditas

15 et eiectionem illum extra vineam occiderunt quid ergo faciet illis dominus vineae

16 veniet et perdet colonos istos et dabit vineam aliis quo audito dixerunt illi absit

17 ille autem aspiciens eos ait quid est ergo hoc quod scriptum est lapidem quem reprobaverunt aedificantes hic factus est in caput anguli

18 omnis qui ceciderit supra illum lapidem conquassabitur supra quem autem ceciderit comminuet illum

19 et quaerebant principes sacerdotum et scribae mittere in illum manus illa hora et timuerunt populum cognoverunt enim quod ad ipsos dixerit similitudinem istam

20 et observantes miserunt insidiatores qui se iustos simularent ut caperent eum in sermone et traderent illum principatui et potestati praesidis

21 et interrogaverunt illum dicentes magister scimus quia recte dicis et doces et non accipis personam sed in veritate viam Dei doces

22 licet nobis dare tributum Caesari an non

23 considerans autem dolum illorum dixit ad eos quid me temptatis

24 ostendite mihi denarium cuius habet imaginem et inscriptionem respondentes dixerunt Caesaris

25 et ait illis reddite ergo quae Caesaris sunt Caesari et quae Dei sunt Deo

26 et non potuerunt verbum eius reprehendere coram plebe et mirati in responso eius tacuerunt

27 accesserunt autem quidam Sadducaeorum qui negant esse resurrectionem et interrogaverunt eum

28 dicentes magister Moses scripsit nobis si frater alicuius mortuus fuerit habens uxorem

et hic sine filiis fuerit ut accipiat eam frater eius uxorem et suscitet semen fratri suo
29 septem ergo fratres erant et primus accepit uxorem et mortuus est sine filiis
30 et sequens accepit illam et ipse mortuus est sine filio
31 et tertius accepit illam similiter et omnes septem et non reliquerunt semen et mortui sunt
32 novissima omnium mortua est et mulier
33 in resurrectione ergo cuius eorum erit uxor siquidem septem habuerunt eam uxorem
34 et ait illis Iesus filii saeculi huius nubunt et traduntur ad nuptias
35 illi autem qui digni habebuntur saeculo illo et resurrectione ex mortuis neque nubunt neque ducunt uxores
36 neque enim ultra mori poterunt aequales enim angelis sunt et filii sunt Dei cum sint filii resurrectionis
37 quia vero resurgant mortui et Moses ostendit secus rubum sicut dicit Dominum Deum Abraham et Deum Isaac et Deum Iacob
38 Deus autem non est mortuorum sed vivorum omnes enim vivunt ei
39 respondentes autem quidam scribarum dixerunt magister bene dixisti
40 et amplius non audebant eum quicquam interrogare
41 dixit autem ad illos quomodo dicunt Christum Filium David esse
42 et ipse David dicit in libro Psalmorum dixit Dominus Domino meo sede a dextris meis
43 donec ponam inimicos tuos scabillum pedum tuorum
44 David ergo Dominum illum vocat et quomodo filius eius est
45 audiente autem omni populo dixit discipulis suis
46 attendite a scribis qui volunt ambulare in stolis et amant salutationes in foro et primas cathedras in synagogis et primos discubitus in conviviis
47 qui devorant domos viduarum simulantes longam orationem hii accipient damnationem maiorem

CAPITULUM 21

Respiciens autem vidit eos qui mittebant munera sua in gazofilacium divites
2 vidit autem et quandam viduam pauperculam mittentem aera minuta duo
3 et dixit vere dico vobis quia vidua haec pauper plus quam omnes misit
4 nam omnes hii ex abundanti sibi miserunt in munera Dei haec autem ex eo quod deest illi omnem victum suum quem habuit misit
5 et quibusdam dicentibus de templo quod lapidibus bonis et donis ornatum esset dixit
6 haec quae videtis venient dies in quibus non relinquetur lapis super lapidem qui non destruatur
7 interrogaverunt autem illum dicentes praeceptor quando haec erunt et quod signum cum fieri incipient
8 qui dixit videte ne seducamini multi enim venient in nomine meo dicentes quia ego sum et tempus adpropinquavit nolite ergo ire post illos
9 cum autem audieritis proelia et seditiones nolite terreri oportet primum haec fieri sed non statim finis
10 tunc dicebat illis surget gens contra gentem et regnum adversus regnum
11 terraemotus magni erunt per loca et pestilentiae et fames terroresque de caelo et signa

magna erunt

12 sed ante haec omnia inicient vobis manus suas et persequentur tradentes in synagogas et custodias trahentes ad reges et praesides propter nomen meum

13 continget autem vobis in testimonium

14 ponite ergo in cordibus vestris non praemeditari quemadmodum respondeatis

15 ego enim dabo vobis os et sapientiam cui non poterunt resistere et contradicere omnes adversarii vestri

16 trademini autem a parentibus et fratribus et cognatis et amicis et morte adficiant ex vobis

17 et eritis odio omnibus propter nomen meum

18 et capillus de capite vestro non peribit

19 in patientia vestra possidebitis animas vestras

20 cum autem videritis circumdari ab exercitu Hierusalem tunc scitote quia adpropinquavit desolatio eius

21 tunc qui in Iudaea sunt fugiant in montes et qui in medio eius discedant et qui in regionibus non intrent in eam

22 quia dies ultionis hii sunt ut impleantur omnia quae scripta sunt

23 vae autem praegnatibus et nutrientibus in illis diebus erit enim pressura magna supra terram et ira populo huic

24 et cadent in ore gladii et captivi ducentur in omnes gentes et Hierusalem calcabitur a gentibus donec impleantur tempora nationum

25 et erunt signa in sole et luna et stellis et in terris pressura gentium prae confusione sonitus maris et fluctuum

26 arescentibus hominibus prae timore et expectatione quae supervenient universo orbi nam virtutes caelorum movebuntur

27 et tunc videbunt Filium hominis venientem in nube cum potestate magna et maiestate

28 his autem fieri incipientibus respicite et levate capita vestra quoniam adpropinquat redemptio vestra

29 et dixit illis similitudinem videte ficulneam et omnes arbores

30 cum producant iam ex se fructum scitis quoniam prope est aestas

31 ita et vos cum videritis haec fieri scitote quoniam prope est regnum Dei

32 amen dico vobis quia non praeteribit generatio haec donec omnia fiant

33 caelum et terra transibunt verba autem mea non transient

34 attendite autem vobis ne forte graventur corda vestra in crapula et ebrietate et curis huius vitae et superveniat in vos repentina dies illa

35 tamquam laqueus enim superveniet in omnes qui sedent super faciem omnis terrae

36 vigilate itaque omni tempore orantes ut digni habeamini fugere ista omnia quae futura sunt et stare ante Filium hominis

37 erat autem diebus docens in templo noctibus vero exiens morabatur in monte qui vocatur Oliveti

38 et omnis populus manicabat ad eum in templo audire eum

CAPITULUM 22

adpropinquabat autem dies festus azymorum qui dicitur pascha

² et quaerebant principes sacerdotum et scribae quomodo eum interficerent timebant vero plebem

³ intravit autem Satanas in Iudam qui cognominatur Scarioth unum de duodecim

⁴ et abiit et locutus est cum principibus sacerdotum et magistratibus quemadmodum illum traderet eis

⁵ et gavisi sunt et pacti sunt pecuniam illi dare

⁶ et spondit et quaerebat oportunitatem ut traderet illum sine turbis

⁷ venit autem dies azymorum in qua necesse erat occidi pascha

⁸ et misit Petrum et Iohannem dicens euntes parate nobis pascha ut manducemus

⁹ at illi dixerunt ubi vis paremus

¹⁰ et dixit ad eos ecce introeuntibus vobis in civitatem occurret vobis homo amphoram aquae portans sequimini eum in domum in qua intrat

¹¹ et dicetis patri familias domus dicit tibi magister ubi est diversorium ubi pascha cum discipulis meis manducem

¹² et ipse vobis ostendet cenaculum magnum stratum et ibi parate

¹³ euntes autem invenerunt sicut dixit illis et paraverunt pascha

¹⁴ et cum facta esset hora discubuit et duodecim apostoli cum eo

¹⁵ et ait illis desiderio desideravi hoc pascha manducare vobiscum antequam patiar

¹⁶ dico enim vobis quia ex hoc non manducabo illud donec impleatur in regno Dei

¹⁷ et accepto calice gratias egit et dixit accipite et dividite inter vos

¹⁸ dico enim vobis quod non bibam de generatione vitis donec regnum Dei veniat

¹⁹ et accepto pane gratias egit et fregit et dedit eis dicens hoc est corpus meum quod pro vobis datur hoc facite in meam commemorationem

²⁰ similiter et calicem postquam cenavit dicens hic est calix novum testamentum in sanguine meo quod pro vobis funditur

²¹ verumtamen ecce manus tradentis me mecum est in mensa

²² et quidem Filius hominis secundum quod definitum est vadit verumtamen vae illi homini per quem traditur

²³ et ipsi coeperunt quaerere inter se quis esset ex eis qui hoc facturus esset

²⁴ facta est autem et contentio inter eos quis eorum videretur esse maior

²⁵ dixit autem eis reges gentium dominantur eorum et qui potestatem habent super eos benefici vocantur

²⁶ vos autem non sic sed qui maior est in vobis fiat sicut iunior et qui praecessor est sicut ministrator

²⁷ nam quis maior est qui recumbit an qui ministrat nonne qui recumbit ego autem in medio vestrum sum sicut qui ministrat

²⁸ vos autem estis qui permansistis mecum in temptationibus meis

²⁹ et ego dispono vobis sicut disposuit mihi Pater meus regnum

³⁰ ut edatis et bibatis super mensam meam in regno et sedeat super thronos iudicantes duodecim tribus Israel

³¹ ait autem Dominus Simon Simon ecce Satanas expetivit vos ut cribraret sicut triticum

³² ego autem rogavi pro te ut non deficiat fides tua et tu aliquando conversus confirma fratres tuos

33 qui dixit ei Domine tecum paratus sum et in carcerem et in mortem ire
34 et ille dixit dico tibi Petre non cantabit hodie gallus donec ter abneges nosse me
35 et dixit eis quando misi vos sine sacco et pera et calciamentis numquid aliquid defuit vobis at illi dixerunt nihil
36 dixit ergo eis sed nunc qui habet saccum tollat similiter et peram et qui non habet vendat tunicam suam et emat gladium
37 dico enim vobis quoniam adhuc hoc quod scriptum est oportet impleri in me et quod cum iniustus deputatus est etenim ea quae sunt de me finem habent
38 at illi dixerunt Domine ecce gladii duo hic at ille dixit eis satis est
39 et egressus ibat secundum consuetudinem in montem Olivarum secuti sunt autem illum et discipuli
40 et cum pervenisset ad locum dixit illis orate ne intretis in temptationem
41 et ipse avulsus est ab eis quantum iactus est lapidis et positus genibus orabat
42 dicens Pater si vis transfer calicem istum a me verumtamen non mea voluntas sed tua fiat
43 apparuit autem illi angelus de caelo confortans eum et factus in agonia prolixius orabat
44 et factus est sudor eius sicut guttae sanguinis decurrentis in terram
45 et cum surrexisset ab oratione et venisset ad discipulos suos invenit eos dormientes prae tristitia
46 et ait illis quid dormitis surgite orate ne intretis in temptationem
47 adhuc eo loquente ecce turba et qui vocabatur Iudas unus de duodecim antecedebat eos et adpropinquavit Iesu ut oscularetur eum
48 Iesus autem dixit ei Iuda osculo Filium hominis tradis
49 videntes autem hii qui circa ipsum erant quod futurum erat dixerunt ei Domine si percutimus in gladio
50 et percussit unus ex illis servum principis sacerdotum et amputavit auriculam eius dextram
51 respondens autem Iesus ait sinite usque huc et cum tetigisset auriculam eius sanavit eum
52 dixit autem Iesus ad eos qui venerant ad se principes sacerdotum et magistratus templi et seniores quasi ad latronem existis cum gladiis et fustibus
53 cum cotidie vobiscum fuerim in templo non extendistis manus in me sed haec est hora vestra et potestas tenebrarum
54 comprehendentes autem eum duxerunt ad domum principis sacerdotum Petrus vero sequebatur a longe
55 accenso autem igni in medio atrio et circumsedentibus illis erat Petrus in medio eorum
56 quem cum vidisset ancilla quaedam sedentem ad lumen et eum fuisset intuita dixit et hic cum illo erat
57 at ille negavit eum dicens mulier non novi illum
58 et post pusillum alius videns eum dixit et tu de illis es Petrus vero ait o homo non sum
59 et intervallo facto quasi horae unius alius quidam adfirmabat dicens vere et hic cum illo erat nam et Galilaeus est
60 et ait Petrus homo nescio quod dicis et continuo adhuc illo loquente cantavit gallus
61 et conversus Dominus respexit Petrum et recordatus est Petrus verbi Domini sicut dixit quia priusquam gallus cantet ter me negabis

⁶² et egressus foras Petrus flevit amare
⁶³ et viri qui tenebant illum includebant ei caedentes
⁶⁴ et velaverunt eum et percutiebant faciem eius et interrogabant eum dicentes prophetiza quis est qui te percussit
⁶⁵ et alia multa blasphemantes dicebant in eum
⁶⁶ et ut factus est dies convenerunt seniores plebis et principes sacerdotum et scribae et duxerunt illum in concilium suum dicentes si tu es Christus dic nobis
⁶⁷ et ait illis si vobis dixero non creditis mihi
⁶⁸ si autem et interrogavero non respondebitis mihi neque dimittetis
⁶⁹ ex hoc autem erit Filius hominis sedens a dextris virtutis Dei
⁷⁰ dixerunt autem omnes tu ergo es Filius Dei qui ait vos dicitis quia ego sum
⁷¹ at illi dixerunt quid adhuc desideramus testimonium ipsi enim audivimus de ore eius

CAPITULUM 23

Et surgens omnis multitudo eorum duxerunt illum ad Pilatum
² coeperunt autem accusare illum dicentes hunc invenimus subvertentem gentem nostram et prohibentem tributa dari Caesari et dicentem se Christum regem esse
³ Pilatus autem interrogavit eum dicens tu es rex Iudaeorum at ille respondens ait tu dicis
⁴ ait autem Pilatus ad principes sacerdotum et turbas nihil invenio causae in hoc homine
⁵ at illi invalescebant dicentes commovet populum docens per universam Iudaeam et incipiens a Galilaea usque huc
⁶ Pilatus autem audiens Galilaeam interrogavit si homo Galilaeus esset
⁷ et ut cognovit quod de Herodis potestate esset remisit eum ad Herodem qui et ipse Hierosolymis erat illis diebus
⁸ Herodes autem viso Iesu gavisus est valde erat enim cupiens ex multo tempore videre eum eo quod audiret multa de illo et sperabat signum aliquod videre ab eo fieri
⁹ interrogabat autem illum multis sermonibus at ipse nihil illi respondebat
¹⁰ stabant etiam principes sacerdotum et scribae constanter accusantes eum
¹¹ sprexit autem illum Herodes cum exercitu suo et inclusit indutum veste alba et remisit ad Pilatum
¹² et facti sunt amici Herodes et Pilatus in ipsa die nam antea inimici erant ad invicem
¹³ Pilatus autem convocatis principibus sacerdotum et magistratibus et plebe
¹⁴ dixit ad illos obtulistis mihi hunc hominem quasi avertentem populum et ecce ego coram vobis interrogans nullam causam inveni in homine isto ex his in quibus eum accusatis
¹⁵ sed neque Herodes nam remisi vos ad illum et ecce nihil dignum morte actum est ei
¹⁶ emendatum ergo illum dimittam
¹⁷ necesse autem habebat dimittere eis per diem festum unum
¹⁸ exclamavit autem simul universa turba dicens tolle hunc et dimitte nobis Barabban
¹⁹ qui erat propter seditionem quandam factam in civitate et homicidium missus in carcerem
²⁰ iterum autem Pilatus locutus est ad illos volens dimittere Iesum
²¹ at illi succlamabant dicentes crucifige crucifige illum

22 ille autem tertio dixit ad illos quid enim mali fecit iste nullam causam mortis invenio in eo corripiam ergo illum et dimittam

23 at illi instabant vocibus magnis postulantes ut crucifigeretur et invalescebant voces eorum

24 et Pilatus adiudicavit fieri petitionem eorum

25 dimisit autem illis eum qui propter homicidium et seditionem missus fuerat in carcerem quem petebant Iesum vero tradidit voluntati eorum

26 et cum ducerent eum adprehenderunt Simonem quendam Cyrenensem venientem de villa et inposuerunt illi crucem portare post Iesum

27 sequebatur autem illum multa turba populi et mulierum quae plangebant et lamentabant eum

28 conversus autem ad illas Iesus dixit filiae Hierusalem nolite flere super me sed super vos ipsas flete et super filios vestros

29 quoniam ecce venient dies in quibus dicent beatae steriles et ventres qui non genuerunt et ubera quae non lactaverunt

30 tunc incipient dicere montibus cadite super nos et collibus operite nos

31 quia si in viridi ligno haec faciunt in arido quid fiet

32 ducebantur autem et alii duo nequam cum eo ut interficerentur

33 et postquam venerunt in locum qui vocatur Calvariae ibi crucifixerunt eum et latrones unum a dextris et alterum a sinistris

34 Iesus autem dicebat Pater dimitte illis non enim sciunt quid faciunt dividentes vero vestimenta eius miserunt sortes

35 et stabat populus expectans et deridebant illum principes cum eis dicentes alios salvos fecit se salvum faciat si hic est Christus Dei electus

36 includebant autem ei et milites accedentes et acetum offerentes illi

37 dicentes si tu es rex Iudaeorum salvum te fac

38 erat autem et superscriptio inscripta super illum litteris graecis et latinis et hebraicis hic est rex Iudaeorum

39 unus autem de his qui pendebant latronibus blasphemabat eum dicens si tu es Christus salvum fac te ipsum et nos

40 respondens autem alter increpabat illum dicens neque tu times Deum quod in eadem damnatione es

41 et nos quidem iuste nam digna factis recipimus hic vero nihil mali gessit

42 et dicebat ad Iesum Domine memento mei cum veneris in regnum tuum

43 et dixit illi Iesus amen dico tibi hodie mecum eris in paradiso

44 erat autem fere hora sexta et tenebrae factae sunt in universa terra usque in nonam horam

45 et obscuratus est sol et velum templi scissum est medium

46 et clamans voce magna Iesus ait Pater in manus tuas commendo spiritum meum et haec dicens expiravit

47 videns autem centurio quod factum fuerat glorificavit Deum dicens vere hic homo iustus erat

48 et omnis turba eorum qui simul aderant ad spectaculum istud et videbant quae fiebant percutientes pectora sua revertebantur

49 stabant autem omnes noti eius a longe et mulieres quae secutae erant eum a Galilaea

haec videntes

⁵⁰ et ecce vir nomine Ioseph qui erat decurio vir bonus et iustus

⁵¹ hic non consenserat consilio et actibus eorum ab Arimathia civitate Iudaeae qui expectabat et ipse regnum Dei

⁵² hic accessit ad Pilatum et petiit corpus Iesu

⁵³ et depositum involvit sindone et posuit eum in monumento exciso in quo nondum quisquam positus fuerat

⁵⁴ et dies erat parasceves et sabbatum inlucescebat

⁵⁵ subsecutae autem mulieres quae cum ipso venerant de Galilaea viderunt monumentum et quemadmodum positum erat corpus eius

⁵⁶ et revertentes paraverunt aromata et unguenta et sabbato quidem siluerunt secundum mandatum

CAPITULUM 24

Una autem sabbati valde diluculo venerunt ad monumentum portantes quae paraverant aromata

² et invenerunt lapidem revolutum a monumento

³ et ingressae non invenerunt corpus Domini Iesu

⁴ et factum est dum mente consternatae essent de isto ecce duo viri steterunt secus illas in veste fulgenti

⁵ cum timerent autem et declinarent vultum in terram dixerunt ad illas quid quaeritis viventem cum mortuis

⁶ non est hic sed surrexit recordamini qualiter locutus est vobis cum adhuc in Galilaea esset

⁷ dicens quia oportet Filium hominis tradi in manus hominum peccatorum et crucifigi et die tertia resurgere

⁸ et recordatae sunt verborum eius

⁹ et regressae a monumento nuntiaverunt haec omnia illis undecim et ceteris omnibus

¹⁰ erat autem Maria Magdalene et Iohanna et Maria Iacobi et ceterae quae cum eis erant quae dicebant ad apostolos haec

¹¹ et visa sunt ante illos sicut deliramentum verba ista et non credebant illis

¹² Petrus autem surgens cucurrit ad monumentum et procumbens videt lintheamina sola posita et abiit secum mirans quod factum fuerat

¹³ et ecce duo ex illis ibant ipsa die in castellum quod erat in spatio stadiorum sexaginta ab Hierusalem nomine Emmaus

¹⁴ et ipsi loquebantur ad invicem de his omnibus quae acciderant

¹⁵ et factum est dum fabularentur et secum quaererent et ipse Iesus adpropinquans ibat cum illis

¹⁶ oculi autem illorum tenebantur ne eum agnoscerent

¹⁷ et ait ad illos qui sunt hii sermones quos confertis ad invicem ambulantes et estis tristes

¹⁸ et respondens unus cui nomen Cleopas dixit ei tu solus peregrinus es in Hierusalem et non cognovisti quae facta sunt in illa his diebus

¹⁹ quibus ille dixit quae et dixerunt de Iesu Nazareno qui fuit vir propheta potens in opere et sermone coram Deo et omni populo

20 et quomodo eum tradiderunt summi sacerdotum et principes nostri in damnationem mortis et crucifixerunt eum

21 nos autem sperabamus quia ipse esset redempturus Israhel et nunc super haec omnia tertia dies hodie quod haec facta sunt

22 sed et mulieres quaedam ex nostris terruerunt nos quae ante lucem fuerunt ad monumentum

23 et non invento corpore eius venerunt dicentes se etiam visionem angelorum vidisse qui dicunt eum vivere

24 et abierunt quidam ex nostris ad monumentum et ita invenerunt sicut mulieres dixerunt ipsum vero non viderunt

25 et ipse dixit ad eos o stulti et tardi corde ad credendum in omnibus quae locuti sunt prophetae

26 nonne haec oportuit pati Christum et ita intrare in gloriam suam

27 et incipiens a Mose et omnibus prophetis interpretabatur illis in omnibus scripturis quae de ipso erant

28 et adpropinquaverunt castello quo ibant et ipse se finxit longius ire

29 et coegerunt illum dicentes mane nobiscum quoniam advesperascit et inclinata est iam dies et intravit cum illis

30 et factum est dum recumberet cum illis accepit panem et benedixit ac fregit et porrigebat illis

31 et aperti sunt oculi eorum et cognoverunt eum et ipse evanuit ex oculis eorum

32 et dixerunt ad invicem nonne cor nostrum ardens erat in nobis dum loqueretur in via et aperiret nobis scripturas

33 et surgentes eadem hora regressi sunt in Hierusalem et invenerunt congregatos undecim et eos qui cum ipsis erant

34 dicentes quod surrexit Dominus vere et apparuit Simoni

35 et ipsi narrabant quae gesta erant in via et quomodo cognoverunt eum in fractione panis

36 dum haec autem loquuntur Iesus stetit in medio eorum et dicit eis pax vobis ego sum nolite timere

37 conturbati vero et conterriti existimabant se spiritum videre

38 et dixit eis quid turbati estis et cogitationes ascendunt in corda vestra

39 videte manus meas et pedes quia ipse ego sum palpate et videte quia spiritus carnem et ossa non habet sicut me videtis habere

40 et cum hoc dixisset ostendit eis manus et pedes

41 adhuc autem illis non credentibus et mirantibus prae gaudio dixit habetis hic aliquid quod manducetur

42 at illi obtulerunt ei partem piscis assi et favum mellis

43 et cum manducasset coram eis sumens reliquias dedit eis

44 et dixit ad eos haec sunt verba quae locutus sum ad vos cum adhuc essem vobiscum quoniam necesse est impleri omnia quae scripta sunt in lege Mosi et prophetis et psalmis de me

45 tunc aperuit illis sensum ut intellegerent scripturas

46 et dixit eis quoniam sic scriptum est et sic oportebat Christum pati et resurgere a mortuis die tertia

47 et praedicari in nomine eius paenitentiam et remissionem peccatorum in omnes gentes incipientibus ab Hierosolyma

48 vos autem estis testes horum

49 et ego mitto promissum Patris mei in vos vos autem sedete in civitate quoadusque induamini virtutem ex alto

50 eduxit autem eos foras in Bethaniam et elevatis manibus suis benedixit eis

51 et factum est dum benediceret illis recessit ab eis et ferebatur in caelum

52 et ipsi adorantes regressi sunt in Hierusalem cum gaudio magno

53 et erant semper in templo laudantes et benedicentes Deum amen

For other languages please go to **www.wordproject.org**